

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' beṇaḥ

1 ¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. ² Cate' gwxe yežlion' ba zoacze' len Diosen'. ³ Len' bene' yogo' beṇaḥ, yogo' angl, yogo' da' ca' beyac da' mal, yogo' beyixē' na' bite'teze da' dech. Bibi de da' gwxe da' bi ben' nzi' Xtiža' Dios. ⁴ Le' nse'e yela' mban. Na' ben' ba zjanape' yela' mban toli tocane da' none', legaquen' ba yo'o be'ni' lo' yichjlažda'ogaquen'. ⁵ Ben' nzi' Xtiža' Dios bide' nse'e be'ni' che yichjlaždao' beṇaḥen', na' la'czla' bene' zan bi gosejnilaže'ne' na' bi gwyo'o be'ni' chen' lo' yichjlažda'ogaque', bi gosezaquede' yosocue'eje' be'ni' che'na'.

⁶ Gwzoa to bene' le Juan, na' Diosen' gwsele'ne'. ⁷ Juanna' ben' bzoe' bene' nis bedeye'e diža' che ben' nsa' be'nin', cont yogo' beṇaḥ guac yesejnilaže'ne'. ⁸ Gague Juanna' nac bene' nsa' be'nin', san le' bedeye'e xtiža' ben' nsa' be'ni' che yichjlaždao' beṇaḥen'. ⁹ Ba bžin ža be'ni' da' nac da' dogualje ba blan' yežlio nga, na' blan' cont gwsenin' lo' yichjlaždao' note'teze bene'.

¹⁰ Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosacbe'ede' non' naque'. ¹¹ Golje' ladjo neto' bene' gualaž che', perw zan neto' bene' gualaž che' bi gwejle'to' chen'. ¹² San bałteze chio' gwejle'cho che', chio' gwejnilaže'chone', bene' cont naccho xi'in Dios. ¹³ Na' gague lagüe goljcho nita' xaxna'cho zjanaque' bene' bela' chen ba naccho xi'in Dios. Na' gague lagüe to bene' byo gwzoalene' to no'ole ba naccho xi'in Dios, na' gague lagüe bene' byon' goclaže' soa xi'ine' ba naccho xi'in Dios, san da' chejnilaže'chone', da'nann' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' beṇaḥ na' gwzoe' len neto'. Na' ble'eto' naque' bene' zaca' juisyw, le togue' naque' dogualje Xi'in Dios. Leca nži'ilaže'de' chio' beṇaḥ na' bedezejni'ide' chio' diža' li che Diosen'. ¹⁵ Juanna' ben' bzoe' bene' nis be'e diža' che', gwne':

—Che bengan' bi'a diža' cate' gwnia': “Bene' za' za' zaca'che' ca neda', le ba zoacze le' cate' bina' soa' neda'.”

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'. ¹⁷ Da' Moisésen' bzejni'ide' da' xoxxta'o neto' bene' Israel ley che Diosen' na' chlo'en yogo'cho napcho dola', na' Jesucriston' bedelo'ede' nži'ilaže' Diosen' chio' beṇaḥ na' bedezejni'ide' chio' diža' li che Diosen'. ¹⁸ Nono na' soa bene' ba ble'ede' Diosen'. Toz ben' nac dogualje Xi'in Dios bene' tliša' ba bzejni'ide' chio' beṇaḥ can' nac yichjlaždao' Diosen', le chacchgüe Diosen' le'.

Juan ben' bzoe' bene' nis be'e xtiža' Jesúsén'

(Mt. 3:11-12; Mr. 1:7-8; Lc. 3:15-17)

¹⁹ Bene' chesenabi'e nación Israel cheton' bene' že' Jerusalén gososele' to chope bxoz na' yebałe bene' gosalje lo diaža che da' Leví cont gosenabde' Juanna' non' naque'. ²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seła' Diosen' yedenabi'e nación chechon'.

²¹ Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

²³ Nach Juanna' gože' legaque':

—Neda' naca' ben' chne žiže to latje daš, žia': “Le gwža' yichjlažda'olen' cont gwzenagle che Xanchon' cate' yide'”, can' gwna da' Isaías ben' be' xtiža' Diosen' cani'.

²⁴ Bene' ca' ja'ac lao Juanna', bene' fariseo ca' gosesele' legaque'.

²⁵ Nach gose'ene':

—¿Bixchen' chzo' bene' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoa' bene' nis, na' gachol le'e ba zoa to bene' bina' gombia'le. ²⁷ Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xe'le'.

²⁸ Yogo' da' quinga goquen gan' nzi' Betábara dan' chi' yešla'a yegw Jordán gan' chzoa' Juanna' bene' nis.

Jesúsén' yeque'e xtoła' benachen'

²⁹ Na' beteyo Juanna' ble'ede' zej Jesúsén' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtoła' benachen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'. ³⁰ Che len' bi'a diža', gwnia': “Ben' za' za' zaca'che' ca neda', na' le' ba zoacze' cate' bina' soa' neda'.” ³¹ Neda' bi

gocbe'eda' non' naque' perw Diosen' bzejni'ide' neda', na' da'nan' zedezoa' bene' nis cont yogo' chio' bene' Israel gacbe'echo non' naque'.

³² Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen len le'. ³³ Neda' bi gocbe'eda' še Jesús nan' naque' ben' gwseła' Diosen', nach Dios ben' gwsele' neda' chzoa' bene' nis gože'nda': “Le'edo' yetj Spiritw chia' na' yega'anen len bene' ba mbeja'. Len' naque' bene' gon cont soa Spiritw chian' lo' yichjlaždao' bene' na' nabian' legaque'.” ³⁴ Ba ble'eda' goc can' gwne' na' cho'a diža' le bengan' Xi'in Dios.

Bene' nechw ca' gwlej Jesúsen' cont gosaque' le' txen

³⁵ Beteyo Juan ben' bzoa bene' nis zeche' da' yoble len yechope bene' zjanaque' txen len le'. ³⁶ Na' cate' ble'ede' gwde Jesúsen', nach gože' bene' ca':

—Le na' ben' gwseła' Diosen' ben' zaca'lebe' ca xila' dao' ben' chot chio' bene' Israel cont Diosen' chezi'xene' xtoła'chon'.

³⁷ Na' cate' bene' ca' chope, ben' zjanaque' txen len Juanna', gosende' can' gwnen' nach ja'aclene' Jesúsen'. ³⁸ Nach beyechj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le?

Na' gose'ene':

—Maestrw, ¿gan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

⁴⁰ Na ca nac bene' ca' chope' bosozenag xtiža' Juanna' na' gosa'ogüe' Jesúsen', toe' Andrés, bene' biše' Simón Pedro. ⁴¹ Na' Andrésen' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

⁴² Nach Andrésen' gwche'e bene' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' bene' le' Cefas. (Na' Cefas zeje diža' Pedro.)

Jesúsen' gwleje' Felipe na' Natanael cont bsed blo'ede' legaque'

⁴³ Beteyo Jesúsen' gwchoglagüen' yeyeje' Galilean' na' jane'e Felipen' na' gože'ne':

—Yo'o len neda'.

⁴⁴ Felipen' goque' bene' Betsaida gan' nac laž Andrésen' len Pedron'.

⁴⁵ Nach Felipen' jane'e Natanaelen' na' gože'ne':

—Bač ble'eto' ben' bzoj da' Moisésen' xtižen' le'e da' ca' gan' bzoje' ley chechon', na' lecze xtiže'na' bosozoj bene' ca' goso'e xtiža' Diosen' cani'.
 Len' Jesús bene' Nazaret, ben' nac xi'in José.

⁴⁶ Nach Natanaelen' gože'ne':

—¿Bat benecho yesene' Nazaret na' choj bene' zaca'?

Nach gož Felipen' le':

—Yo'o cont le'edo'.

⁴⁷ Na' Jesúsén' ble'ede' bač zej Natanaelen' gan' zoe'na' nach gwne':

—Na' za' to bene' Israel gualaž chechon' bene' naque' bene' güen. Ne late'ze bi naque' bene' gwxiye'.

⁴⁸ Natanaelen' bende' xtiža' Jesúsén' na' gože'ne':

—¿Nac chac nombi'o neda?

Na' Jesúsén' gože'ne':

—Ble'eda' le' šlac zechao' xan yag yixgüigw cate' za' ne Felipen' le'.

⁴⁹ Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' sela' Diosen' yedenabi'o nación Israel chechon'.

⁵⁰ Na' Jesúsén' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. ⁵¹ Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwsela' Dios golja' benačh.

Gota' to yela' güešagna' yež da' nzi' Caná

2 ¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsén' gwyeje' liž ben' gan' gota' yela' güešagna'na'. ² Na' lecze gosaxe' Jesúsén' len bene' ca' zjanaque' le' txen cont ja'aque' gan' chac yela' güešagnan'. ³ Na' bebiž vino dan' chese'ej bene' ca' že'na', na' xna' Jesúsén' gože' le':

—Bich bi vino chegaque' de.

⁴ Na' gož Jesúsén' le':

—¿Bixchen' žo' ca'? le biña' žin hor gwlo'a non' naca'.

⁵ Na' xne'ena' gože' bene' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosochin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis. ⁷ Nach Jesúsén' gože' bene' güen mandadw ca':

—Le yosša' yeso' yej ca' nis.

Na' gosegue'en nis goseža'ten. ⁸ Nach gože' legaque':

—Le gaše' laten' na'a na' le šjanežjon ben' yo'o lo ne'e lnin'.

Na' gosone' can' gwnen'. ⁹ Na' ben' yo'o lo ne'e lnin' con bnixen' bi nezde' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan', ¹⁰ na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao lnin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lnin'.

¹¹ Da' nga ben Jesúsén' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

¹² Gwde na' Jesúsén' gwyeje' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

Jesúsén' bebeje' bene' cheson ya'a chyo'o yodao' blaó

(Mt. 21:12-13; Mr. 11:15-18; Lc. 19:45-46)

¹³ Na' ba zoa gala' lni che neto' bene' Israel da' nzi' pascw, nach Jesúsén' gwyeje' Jerusalén len bene' ca' zjanaque' le' txen. ¹⁴ Cate' bžine' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. ¹⁵ Jesúsén' ble'ede' can' chaca' na' bene' to tašjw de do na' bchinén' cont bebeje' yogo' bene' ca' že' chyo'o yodaon', len xila' ca', len go'n ca', na' besłase' xmechw bene' chosoša' mechon' na' gwlo'oni'ane'e xmesgaquen'. ¹⁶ Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: “Da' chi'chgua yichja' che ližon' chonten ga saca'zi'chgua'.”

¹⁸ Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

¹⁹ Jesúsén' boži'e xtiža'gaquen' gwne':

—Le yochinj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

²¹ Perw Jesúsén' bsaca'lebde' cuerp chen' yodao' cate' gwne' ca', na' legaque' gosone' xbab che yodao' na'zen' gwne' ca'. ²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsén'.

Jesúsén' nezde' bin' yo'o lo' yichjlaždao' benachen'

²³ Šlac gwzoa Jesúsén' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwseła' Dios. ²⁴ Perw Jesúsén' bi ben cuine' lo na'gaque', le nombi'e yichjlaždao' benachen'.

²⁵ Bi byažjde' no ye' le' xbab da' yo'o lo' yichjlaždao' bene' ca'. Le nezeczede' bin' yo'o lo' yichjlaždao' to to chio' benach.

Jesúsen' len Nicodemo

3 ¹ Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'. ² Gwyeje' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

³ Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. ⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocane che bene' chesejnilaže' Diosen'. Da'nan' žacho chesalje' yeto. ⁷ Bi yebando' dan' gwnia' chonen byen yogo' bene' galje' yeto. ⁸ Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga? ¹¹ Da' li neto' chyixjue'eto' da' nezeto' na' choe'to diža' che da' ba ble'eto' na' bi chejle'le. ¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ Toze neda' naca' ben' gwsela' Diosen' golja' benach za'a yaba na' noch no zoa no ba beyep yaba cont nezde' che Diosen'. ¹⁴ Na' can' goc latje daš can' cate' gwlis da' Moisésen' bel de bronze bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' benach. ¹⁵ Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli tocane.

Chaque Diosen' benachen'

¹⁶ Leca chaque Diosen' chio' benach, na' gwsela' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocane. ¹⁷ Na' Diosen' gwsele' Xi'inen' yežlio nga gague cont gwnežjue'

castigw che xtola' benachen', san cont gwnežjue' yela' mban chegaque' toli tocanē.

¹⁸ 'Note'tez bene' chesejnilaže' Xi'in Diosen' bene' tlišan', bi yesezi'e castigw che xtola'gaquen', perw bene' bi chesejnilaže'ne' ba nchoglaon chegaque' yesezaca'zi'e toli tocanē da' bi chesejnilaže' Xi'in Dios bene' tlišan'. ¹⁹ Na' can' naquen, bene' bi chesejnilaže' Xi'in Diosen' ba nchoglaon chegaque' yesezaca'zi'e toli tocanē. Nchoglaon yesezacazi'e, le ba bid Xi'in Diosen' nse'e be'ni' che yichjlaždao' benachen' perw na' chesyebchde' dan' nac chol' clēl ca be'ni' chen', dan' chesone' da' malen'. ²⁰ Yogo' bene' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal. ²¹ San note'tez bene' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

Juan ben' bzoa bene' nis be'che' diža' che Jesúsēn'

²² Gwde na' Jesúsēn' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' bene' nis. ²³ Na' Juanna' lecze bzoe' bene' nis yež gan' nzi' Enón da' chi' gala'ze Salim, le na' dechgua nis. Na' ja'ac bene' gan' gwzoen' cont bzoe' legaque' nis. ²⁴ Caten' bina' yeseyixjue' Juanna' ližyan' goc ca'.

²⁵ Nach gwche' to žaš len bene' ca' zjanaque' txen len Juanna' na' yeto chope bene' Israel gualaž cheto' che dan' cheszoa bene' nis. ²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bač chzoe' bene' nis na' yogo'ze bene' chja'aque' gan' zoe'na'.

²⁷ Nach Juanna' gože' legaque':

—Nono gacxene' še bi gon Diosen' cont yesonxen bene' le'. ²⁸ Nezczele can' ba gwnian', bi naca' Cristo ben' chbezcho seļa' Diosen' yedenabi'e chio', san naca' ben' gwsēļa' Diosen' cont bia' xtižen' žialaole. ²⁹ Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'. ³⁰ Len' cheyaļa' šejch yesonxen bene' le' na' neda' cheyaļa' šejch yesanlaže' neda'.

Bene' za' gan' zoa Diosen'

³¹ Ca nac Cristo ben' za' gan' zoa Diosen', le' naque' bene' zaca'ch ca yogo'lol bene'. Yezica'chle benach zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'. ³² Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. ³³ Na' note'tez bene' chosozenag xtiža' ben' za' gan' zoa Diosen', nacbia' bena'

nezde' Diosen' cho'e diža' li. ³⁴ Na' bena' gwsela' Diosen', bena' za' gan' zoe'na', len' cho'e xtiža' Diosen', le Spiritw che Diosen' zoan len le', na' cate' Diosen' chone' Spiritw chen' bi chyisen' late' güeje. ³⁵ Diosen' chacde' Xi'ine' Criston' na' ba bene' lo ne'e yogo'lol da' de yežlion'. ³⁶ Na' bene' ca' chesejnilaže' Xi'in Diosen' de yela' mban chegaque' toli tocane, san bene' cheson güedenag len Xi'in Diosen', bi gata' yela' mban chegaque', le Diosen' gone' cont yezezaca'zi'e toli tocane.

Jesúsen' be'e diža' len to no'ole Samaria

4 ¹⁻³ Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwnezde' bene' fariseo ca' gosacbe'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

⁴ Na' benen byen zjaya'aque' nez da' chde Samarian'. ⁵ Ca' goquen' besežine' to yež da' nzi' Sicar lo distritw Samarian'. Yežen' chega'anen gala'ze gan' de yežlio dan' bnežjw da' Jacob da' xi'ine' José. ⁶⁻⁸ Na' žia to bej da' nacchgua sitjw da' nzi' Bej che da' Jacob. Ca do guagwbiž Jesúsen' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Ben late' nis ye'eja'.

⁹ Na' no'ole Samarian' boži'en gože'ne':

—¿Nacxechen' le' naco' bene' Israel chnabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca'.) ¹⁰ Nach Jesúsen' gože'ne':

—Neda' ba goša' le': “Ben late' nis ye'eja'”, na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwñabdon' neda' na' ba beña' le' nis da' choñ yela' mban toli tocane šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choñ yela' mbanna' žo' ca'? ¹² ¿Chacdo' zaca'cho' ca da' xoxzta'ocho Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble. ¹⁴ Na' note'tez bene' ye'ej nisen' gwnežjua'ne' neda', gwbatech bilden' da' yoble,

le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocanē.

¹⁵ Na' no'olen' gože'ne':

—Bene', ben neda' nisen' žo' ca' cont bich bildan' na' bich yida' dexian' nga.

¹⁶ Jesúsen' gože'ne':

—Beyej jel güiž bene' chio' na' le da nga.

¹⁷ Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa, ¹⁸ le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

¹⁹ Na' gož no'olen' le':

—Bene', chacbe'eda' naco' to bene' chac chyixjue'ede' bi da' ža Diosen'.

²⁰ Da' xozxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalénna' cheyala' gonxenchone'.

²¹ Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalénna'. ²² Le'e nacle bene' Samaria bi nombia'yanle'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'. ²³ Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'. ²⁴ Diosen' bi naque' bene' bela' chen, naque' spiritw. Da'nan' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

²⁵ Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

²⁶ Nach Jesúsen' gože' no'olen':

—Neda' choe'lena' le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'. ²⁸ Nach no'olen' bocua'an che'e nis chen' na' beyeje' lo yežen' jayeže' bene' gualaž che' ca':

²⁹ —Le šo'o le na' to bene' ba gože' neda' yogo'te da' ba bena'. ěŠe bengan' Cristo ben' chbezcho yedenabi'e?

³⁰ Na' besežaše' yežen' ja'aque' gan' chi' Jesúsen'. ³¹ Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

³² Na' Jesúsen' gože' legaque':

—Bi nezele de to yela' guagw chia'.

³³ Na' gose' lježe':

—¿Gague ba bedesesan bene' da' gwdagüe'?

³⁴ Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben' gwsela' neda' cont gac yogo' da' chnaláže'. ³⁵ Le'e žale: “Ne' dech yetap bio' cont yedobe cosešen'.” Na' neda' chnia', le na' na' le'ele to coseš da' chyažje yedob na'a. ³⁶ De da' goncho na'a cont bene' yosozenague' che Diosen' na' gata' yela' mban chegaque' toli tocane. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz. ³⁷ Diža' nga naquen da' li, žan: “Bene' yoble chaz na' bene' yoble chelap.” ³⁸ Bač chsela' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

³⁹ Na' ca nac bene' yež Sicar ga mbane Samaria, zane' gosejniláže' Jesúsen' da' gosende' gwna no'olen': “Ba gože' neda' yogo' da' ba bena'.”

⁴⁰ Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža. ⁴¹ Na' bene' zanch gosejniláže' Jesúsen' cate' gosende' diža' da' be' cuine'. ⁴² Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

Jesúsen' beyone' xi'in to bene' gwnabia'

⁴³ Na' cate' goc chop ža, Jesúsen' len bene' ca' zjanaque' le' txen gosa'aque' jaya'aque' Galilea. ⁴⁴ Le cuin Jesúsen' ba gwne' note'teze bene' cho'e xtiža' Diosen', bi chesonla'anče bene' gualaž chen' le'. ⁴⁵ Na' cate' besežine' Galilean' bene' gualaž chegaquen' bosolebe' Jesúsen' dan' ba besele'ede' yogo' da' güen da' bene' Jerusalénna' lo lnin', le lencze legaque' ja'aque' lnina'.

⁴⁶ Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to bene' gwnabia' bene' chon žin che rey, na' chacšenchgüe xi'ine'. ⁴⁷ Xa bi'na' cate' bende' ba bežin Jesúsen' Galilean' zeze'e Judean', nach gwyeje' lao Jesúsen' gwneyoede' le' šje' šjayene' xi'inen', le ba zoa gatbe'. ⁴⁸ Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

⁴⁹ Nach ben' chon žin che reyen' gota'yoede' le' gwne':

—Bene', yo'ošca šlac bina' gat bi' chian'.

⁵⁰ Na' Jesúsen' gože'ne':

—Beyej ližo', bi gat bi' chion'.

Nach gweyjele' bena' dan' gož Jesúsen' le' na' beze'e. ⁵¹ Ba zoa yežine' cate' jasešag xmose' ca' le' na' gose'ene':

—Ba beyac bi' chion'.

⁵² Na' gwnabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

⁵³ Na' xaben' gocbe'ede' ca hor na'czen' gož Jesúsen' le' bi gat bi' chen'.
Nach gwejnilaže' Jesúsen', le' len yogo' bene' že' ližen'.

⁵⁴ Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

Jesúsen' beyone' to bene' nat late' cuerp che'

5 ¹ Na' gwde to tiemp bžin ža goc yeto lni che neto' bene' Israel Jerusalénna', na' Jesúsen' gweyje'. ² Jerusalénna' gala'ze cho'a puert che ze'e da' nychj ciudan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. ³ Na' bene' zan bene' güe' zjadie' chalšil ca', no bene' lchol, no bene' nxinj ni'e, no bene' natsi' late' güeje cuerp chegaquen'. Zjadie' chesebeze' batcan' ta nisen'. ⁴ Le tgüeje betj to angl na' bte' nisen', na' bene' nechw bene' cho'e lo' nisen' cheyož chta anglen' len, cheyacde' bite'tez yižgüe' che'ede'. ⁵ Na' cate' bžin Jesúsen' na' de to bene' ba goc šino'šonechoa iz chacšende'.

⁶ Na' Jesúsen' ble'ede' ben' na' gocbe'ede' ba chac sša de' ca', na' gože'ne':
—¿Chaclažo' yeyaco'?

⁷ Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' chetje' lo' nisen'.

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de lsens gon neto' bene' Israel žin. ¹⁰ Nach bene' gwnabia' che neto' bene' Israel gose'e bena' beyaquen':

—Ža che Dios na'a. Bi de lsens yeyoa' xta'ona'.

¹¹ Na' gož ben' legaque':

—Bena' beyon neda' gože'nda': “Botobe xtaon' na' gwda.”

¹² Nach gose'ene':

—¿Non' gož le': “Botobe xtaon' na' gwda”?

¹³ Na' ben' beyaquen' bi gwnezde' non' beyon le', le Jesúsen' benite' ladjo bene' zan ca'. ¹⁴ Gwdechle Jesúsen' bedile' bena' beyaquen' lo' yodao' blaon' na' gože' le':

—Bach beyaco' na'a, na' cheyala' cuejyichjo' da' malen' bich gonon', cont bi gac chio' to da' malech.

¹⁵ Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'. ¹⁶ Da'nan' bene' gwnabia'

ca' gwzolao gosebe'na'ogüe' Jesúsén' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de Isens gon neto' bene' Israel žin. ¹⁷ Na' Jesúsén' gože' legaque':

—Xan' zoacze' chelalde' bate'teze na' lecze ca' neda'.

¹⁸ Da'nán' goseyiljwlaže'che' nacle yesone' yesote' Jesúsén', perw gague neche bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca zaque' len Diosen'.

Yela' chnabia' da' nape Xi'in Diosen'

¹⁹ Na' gož Jesúsén' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. ²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele.

²¹ Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban chegaque'. ²² Na' Xan' bi chchoglagüe' che ne to bene' še nape' doła', san ba gwlo'e lo na' choglagua' che yogo' benach še non' nap doła'. ²³ Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

²⁴ Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban chegaque' toli tocañe. Na' bi yezaca'zi'e toli tocañe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neche ba chesejnilaže'ne'. ²⁵ Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban chegaque' toli tocañe, na' bach chzolao chac ca' na'a. ²⁶ Xa' Diosen' zoacze' toli tocañe na' chone' cont zjamban benachen', na' lecze ba bene' cont neda' naca' Xi'ine' zoa' toli tocañe na' chona' cont zjamban bene'. ²⁷ Na' lecze ba bene' neda' yela' chnabia' cont nia' non' nap doła', le ba gwsele' neda' golja' benach. ²⁸ Bi yebanele dan' chnia' nga, le gwžin ža cate' yogo'lol bene' guat že' lo' ba yesende' cate' yol güiža'ne'. ²⁹ Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yezaca'zi'e toli tocañe.

Jesúsén' bzejni'ide' nape' yela' chnabia'

³⁰ Bibi gac gona' to gualaza'. Chzenaga' bin' ža Xan' cont nia' che benachen' noe' nap doła'. Na' dan' nia' gac che to to bene' naquen da' cheyala' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseła' neda'. ³¹ Šaca' toz neda' chgua'a da' bali non'

naca', bi naquen to da' šejle'le. ³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le. ³³ Bač gwsele'le bene' lao Juanna' cont jasenabde' le' nac nac chia', na' Juanna' be'e diža' li non' naca'. ³⁴ Perw neda' bi chyažjda' diža' da' güe' ne to benach chia'. San chnia' da' quinga cont le'e šejle'le chia' na' gata' yela' mban chele toli tocane. ³⁵ Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsed blo'eden'. ³⁶ Na' de to da' choe' xtiža' da' zaca'ch ca diža' da' choe' Juanna' chia': chona' yogoloł da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. ³⁷ Nach Xan' ben' gwsele' neda' lecze cho'e xtižan', la'czla' biña' yenele can' chnen' na' biña' le'ele can' naquen'. ³⁸ Xtižen' biña' šon' lo' yichjlažda'olen', le bi chejnilaže'le neda' naca' ben' gwsele'.

³⁹ Chsedyane'le gan' nyoj Xtiža' Diosen', le chaquele gaple yela' mban toli tocane neche chsedlen. Na' da' ca' chsedlen' zjanyojen chesoen' xtiža'. ⁴⁰ Perw bi chaclaže'le šejnilaže'le neda' cont gata' yela' mban chele toli tocane.

⁴¹ Na' neda' bi chyažjda' yesena benachen' naca' bene' zaca'. ⁴² Nombi'a le'e na' nezda' bi chaquele Diosen'. ⁴³ Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'. ⁴⁴ ¿Nacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen. ⁴⁵ Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchgualle dan' bzojen' chaquele cont soale binlo len Diosen', perw bi chejle'le xtižen'. ⁴⁶ Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. ⁴⁷ Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

6 ¹ Gozde goc ca' Jesúsen' gwyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. ² Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. ³ Na' gwloe Jesúsen' to lo ya'a len bene' ca' zjanaque' le' txen na' gosebi'e. ⁴ Na' da' yoble ba zoa gała' lni che neto' bene' Israel da' nzi' pascw. ⁵ Na' cate' gwña' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

⁶ Gwne' ca' yešque bi na Felipen', le Jesúsen' nezeczedede' naquen' gone'. ⁷ Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsén' txen le Andrés na' naque' bene' biše' Simón Pedro. Na' Andrésén' gože' Jesúsén':

⁹ —Nga zoa to bi' byo dao' na' de gayo' yetextil de cebada chebe' na' yechope bel ya'a. Perw čbi de gon da' quinga? le bene' zanna' že' nga.

¹⁰ Nach Jesúsén' gože' bene' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'. ¹¹ Nach gwxi' Jesúsén' yetextil ca', na' beyož be'e yela' choxcen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len bel ya'a ca'. Na' goso'e to toe' con ca'te'te' gosaclaže' gosagüe'. ¹² Na' beyož gosagüe' ca'te'te' goseljde', Jesúsén' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

¹³ Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome. ¹⁴ Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho seła' Diosen' yežlio nga.

¹⁵ Na' cate' Jesúsén' gocbe'ede' ba zoa yeseche'exoxje' le' cont yesone' le' rey chegaque', nach gozze'e gozeje' ya'adaon' toze'.

Jesúsén' gwze'e lo nisdaon'

(Mt. 14:22-27; Mr. 6:45-52)

¹⁶ Cate' ba gwxin, bene' ca' zjanaque' Jesúsén' txen jaya'aque' cho'a nisdaon'. ¹⁷ Na' besyeyo'e to lo' barcw zjaya'aque' ciuda Capernaum. Ba goł na' Jesúsén' bina' yežine'. ¹⁸ Na' chas chata' chac nisdaon' le chechjchgua be'. ¹⁹ Ba goc sša zjaya'aque' len barcon' lo nisdaon' cate' besele'ede' ba zjayda Jesúsén' cheze'e lo nisen' gala'ze gan' zej barcon'. Na' besežebe'. ²⁰ Na' gože' legaque':

—Nedan', bi žeble.

²¹ Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

Bene' zan chesyeyiljue' Jesúsén'

²² Na' beteyo bene' zan bene' ca' besyega'an yešla'a cho'a nisdaon' gosacbe'ede' nono Jesúsén' nla' na' gosacbe'ede' bibi barcw yoble gota'ch san toga dan' besyeyo'o bene' ca' zjanaque' Jesúsén' txen, na' zjanезде' Jesúsén' bi beyo'e len legaque' lo' barcon'. ²³ Nach besežin barcw da' za'ac ciuda Tiberias gala'ze gan' gosagüe' yetextilen' caten' beyož be' Xancho Jesúsén' yela' choxcen che Diosen'. ²⁴ Na' cate' gota'bia' nono Jesúsén' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsén' do na'.

Yela' guagw da' chnežjon bene' yela' mban toli tocane

²⁵ Na' cate' bene' zan ca' besyeželde' Jesús'en' yešla'ale nesdaon' nach gose'e le':

—Maestrw, ¿batca' bla'o nga?

²⁶ Na' Jesús'en' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'. ²⁷ Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' gon yela' mban chele toli tocane. Diosen' gwsele' neda' golja' benach na' neda' gona' to da' ye'ej gagwle cont gata' yela' mban chele toli tocane. Na' Xa' Diosen' ba blo'e naca' ben' ba gwsele'.

²⁸ Na' gose'ene':

—¿Bi cheyala' gonto', cont yebe Diosen' neto'?

²⁹ Na' gož Jesús'en' legaque':

—Da' nga gonle cont yebe Diosen' le'e, šejnilaže'le neda' naca' ben' gwselen'.

³⁰ Na' gose'e Jesús'en':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'?

³¹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', žan: "Yela' guagw da' za' yaban' be'e legaque' gosagüe'."

³²⁻³³ Nach Jesús'en' gože' legaque':

—Chnia' le'e to da' zejen, gague da' Moisés'en' bnežjue' da' xozxta'ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwsela' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

³⁴ Nach bene' ca' gose'e le':

—Bene', benšca neto' yela' guagon' žo' ca' gagwton' yogo' ža.

³⁵ Nach Jesús'en' gože' legaque':

—Neda' naca' yela' guagw da' chnežjon bene' yela' mban toli tocane. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli tocane. ³⁶ Na' ba gwnicza' le'e, la'czla' ba ble'ele neda' bi chejnilaže'le neda'. ³⁷ Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. ³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsela' neda'. ³⁹ Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'. ⁴⁰ Xan' chaclaže' yogo'lol bene' yesejni'ide' non' naca' na' yesejnilaže' neda' cont

gwnežjue' legaque' yela' mban toli tocane, na' neda' yosbana' legaque' ladjo bene' guaten' še ba gosate' cate' žin ža te che yežlion'.

⁴¹ Na' zan bene' Israel gualaž cheto' legacze' besežeše' che dan' gwna Jesúsen': "Neda' naca' yela' guagw da' za' yaba." ⁴² Gosene':

—¿Gague bengan' Jesús xi'in José? Nombia'cho xaxna' bengá. ¿Bi dižan' cho'e že' ze'e yaba betje' yežlio?

⁴³ Nach Jesúsen' gože' legaque':

—Bich žešele chia'. ⁴⁴ Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. ⁴⁵ Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

⁴⁶ 'Bi nacho zoa bene' ba ble'ede' Xan'. Toza' neda' ba ble'eda'ne', le za'a gan' zoen'. ⁴⁷ Chnia' le'e to da' zejen, bene' chesejnilaže' neda', de yela' mban chegaque' toli tocane. ⁴⁸ Neda' naca' yela' guagw da' chnežjon yela' mban toli tocane che benachen'. ⁴⁹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. ⁵⁰ Neda' cho'a diža' che to yela' guagw da' za' yaban' na' bene' chagw len bi gate'. ⁵¹ Neda' naca' yela' guagw dan' za' yaban' dan' nsa' yela' mban toli tocane. Bene' šejnilaže' neda', bane' toli tocane. Na' yela' guagw da' chnežjua' cont gata' yela' mban che benachen' naquen cuerp chia'.

⁵² Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp chen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp chian' na' še bi che'ejle xchenan', bi de yela' mban chele toli tocane. ⁵⁴ Bene' chesagw cuerp chian' na' chese'eje' xchenan' de yela' mban chegaque' toli tocane, na' še ba gosate', cate' te che yežlion' yosbana' legaque' ladjo bene' guat ca'. ⁵⁵ Le cuerp chian' naquen dogualje yela' guagw, na' xchenan' naquen dogualje da' ye'ejle. ⁵⁶ Bene' ca' chesagw cuerp chia' na' chese'eje' xchenan' de yela' mban chegaque' toli tocane, na' zjanaque' txen len neda' na' neda' naca' txen len legaque'.

⁵⁷ Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocane dan' zjanaque' txen len neda'. ⁵⁸ Cuerp chian' naquen yela' guagw da' za' yaba. Na' len bi naquen ca da' gosagw da' xozxta'ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocane.

⁵⁹ Jesúsen' bsd blo'ede' da' ca' lo' yodao' che bene' Israel gualaž cheto' ca' da' zoa Capernaum.

**Xtiža' Jesúsen' chnežjon yela' mban toli tocane che bene'
chosozenag chen**

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

⁶¹ Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'? ⁶² ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwseļa' Diosen' golja' benach.

⁶³ Spiritw chian' chnežjon benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocane še šejle'le chen. ⁶⁴ Perw ne' nita' balle bi chejle'le.

Jesúsen' gwne' ca' le' gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo na' bene' ca' cheseque'ede' le'.

⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. ⁶⁷ Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle?

⁶⁸ Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. ⁶⁹ Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocane.

⁷⁰ Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

⁷¹ Gwne' ca' che Judas Iscariote ben' naque' xi'in to bene' le' Simón, le' gwnezde' Judasen' ba naquen gwdie' le' lo na' bene' ca' cheseque'e le', na' Judasen' naque' to bene' šižinw ca'.

Bene' biše' Jesúsen' bi gosejnilaže' le'

7 ¹ Gwde na' Jesúsen' gw dacze' bsd blo'ede' ben' že' distritw Galilean'. Bich goclaže' šejche' Judean', le' bene' gwnabia' che nación Israel cheton' že' na' cheseyiljue' nacle yesone' yesote'ne'. ² Na' ba zoa gala' lni che neto' bene' Israel da' nzi' lni che Ranšw Yix. ³ Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag chio' yesele'ede' yela' guac dan' chonon'. ⁴ Note'teze bene' še chaclaže'

yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lo' bene' can' chonon'.

⁵ Bene' biše' Jesúsen' gose'ene' ca', le ne legaque' bi gosejnilaže'ne'.

⁶ Nach gož Jesúsen' legaque':

—Biña' žin ža ša'a, san le'e guac šja'acle bate'teze. ⁷ Bene' ca' bi zjanombi'e Diosen' bi gac yeseque'ede' le'e, san cheseque'ede' neda', le chzejni'ida'ne' chesone' da' xinj. ⁸ Le šja'ac lnin'. Neda' bi sa'a na'a, le biña' žin ža chia'.

⁹ Beyož gože' legaque' ca' bega'ane' Galilean' yeto chop ža.

Jesúsen' gwyeye' Jerusalén gan' yo'o lnin'

¹⁰ Nach gwde gosa'ac bene' biše' ca' zja'aque' lnin' gwza' Jesúsen' len bene' ca' zjanaque' le' txen zja'aque' lnin', perw bi ja'aque' can' nla'ze san bagaše'ze. ¹¹ Na' bene' gwnabia' che nación Israel cheton' že' Jerusalénna' besyeyiljue' le' lo lnin', chesene':

—¿Ganxe bena'?

¹² Na' bene' ca' zjandop zjanžag lo lnin' šižize goso'e diža' che Jesúsen', na' gague toze ca' gosene'. Bale' gosene': “Naque' bene' güen”, na' bale' gosene': “Bi naque', chonlede' bene'.”

¹³ Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesacbe'ede' cheso'e diža' güen che Jesúsen'.

¹⁴ Na' do gašje zej lnin' cate' gwyej Jesúsen' gan' zoa yodao' blao che neto' bene' Israel na' gwzolao chsed chlo'ede'. ¹⁵ Na' besyebane bene' gwnabia' ca', gosene':

—¿Nacxečen' da' zan neze benga? le gague bi nseden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab checza', san naquen xbab che bene' gwsela' neda'. ¹⁷ Note'tez bene' chesaclačže' yesone' can' chazlačže' Dios ben' gwsela' nedan', guacbe'ede' še dan' chsed chlo'edan' zan' che Dios o še naquen da' chaljlačže'za'. ¹⁸ Cate' to bene' chsed chlo'ede' xbab checze', cheyiljue' nacle gone' cont gacxene'. San cate' to bene' chacláčže' gacxen bene' gwsela' le', nezecho xtižen' naquen da' li na' bi chziye'e.

¹⁹ 'Da' Moisésen' bene' le'e ley dan' nsedlen' perw ne tole bi chonle can' žanna'. ¿Bixčen' cheyiljwle nacle gonle gotlenda'?

²⁰ Bene' ca' že'na' gose'ene':

—Yo'o da' xigüen', nan' chol chnenošo'. ¿No chacláčže' got le'?

²¹ Jesúsen' gože' legaque':

—Toz yela' guac da' bena' ža che Dios cate' bi de lsens gon chio' bene' Israel žin, na' yogo'le chebanele. ²² Da' Moisésen' bene' mandadw soacho señw dan' že' circuncisión (la'czla' bi gwzolao señon' len le' san len da' xoxxta'ocho ca' bene' gwnita' cani'te), na' da'nan' chzoale bi' byo dao' ca' señwna' ža che Dios. ²³ Can' naquen, la'czla' še naquen ža che Dios,

chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixchen' chža'ale neda' dan' ba beyona' to bene' güe' ža che Diosen'? ²⁴ Bi cheyała' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gacbe'ele non' cheyała' yosbaga'le.

Jesúsen' gwne' ze'e gan' zoa Diosen'

²⁵ Nach to chope bene' Jerusalén ca' gosene':

—¿Gague benga ben' chesyeyiljue' cont yesote'ne'? ²⁶ Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'?

²⁷ Perw nezecho ga bene' benga, na' cate' yid Criston' nono yeseneze ga bene' le'.

²⁸ Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'le'. ²⁹ Neda' nombi'ane', le za'a gan' zoen' na' le' gwsele' neda'.

³⁰ Na' da' gwne' ca' bal bene' gosaclače'chgüe' yesezene' le', perw nono gwzen le' da' biña' žin ža gague' lo na'gaquen'. ³¹ Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' che Jesúsen'. Da'nan' bosoxi'e len bene' ca' zjanac bxož gwnabia' che nación Israel cheton' na' gosesele' bene' chesape' yodao' blaon' cont šjasexene' Jesúsen'. ³³ Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseła' neda'. ³⁴ Na' yeyiljwle neda' na' bi yeželele neda', le gan' soan' bi gac yidle.

³⁵ Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas bene' gualaž checho ladjo bene' griego ca' na' gwsed gwlo'ede' legaque'?

³⁶ ¿Bi zejen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

Jesúsen' be'e diža' che Spiritw che Diosen'

³⁷ Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' zižje, gwne':

—Note'tezle še lo' yichjlažda'olen' nacle ca bene' chbillaže', cheyała' šejnilaže'le neda' na' gona' le'e yela' mban toli tocane, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to

bene' chbillaže'. ³⁸ Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsén' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' bina' yedesoan lo' yichjlaždao' bene', le bina' gac yogo' da' cheyala' gac cont gacbia' Jesúsén' naque' bene' zaca' juisyw.

Gosaque' chople neche Jesúsén'

⁴⁰ Bene' ca' chosozenag xtiža' Jesúsén' bale' gosene':

—Da' li benga naque' ben' choe' xtiža' Diosen' ben' naquen yide'.

⁴¹ Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe nacho bene' Galilea ba gwlej Diosen' cont yedenabi'e chio'?

⁴² Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

⁴³ Can' goc bene' ca' gosaque' chople neche Jesúsén'. ⁴⁴ Na' bale' gosaclačže' yesezene'ne', perw nono gwzen le'.

Bene' gwnabia' che nación Israelen' bi gosejle'e che Jesúsén'

⁴⁵ Na' bene' chesape' yodao' blaon' jaya'aque' gan' nita' bxož gwnabia' ca' len bene' fariseo ca', le bene' can' gosesele' legaque' cont yesezene' Jesúsén'. Na' bene' ca' gose'e legaque':

—¿Bixchen' bi nche'elne'?

⁴⁶ Na' bene' chesape' yodao' blaon' gose'ene':

—Bina' yeneto' bene' cho'e diža' güen ca dan' choe' bena'.

⁴⁷ Nach bene' fariseon' gose'e legaque':

—¿Lente le'e ba gwxiye'e? ⁴⁸ Ne toz neto' nacto' bene' fariseo bina' šejle'to' xtižen' na' neca bene' gwnabia' chechon', ne toze' bina' šejle'e xtižen'. ⁴⁹ Perw bene' quinga že' nga bi zjanombi'e ley dan' bzož da' Moisésén' na' ba zjambiaye'e, da'nan' chesejle'e xtižen'.

⁵⁰ Na' Nicodemo ben' gwyej lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

⁵¹ —Ley chechon' bi choen' latje choglaochó che to bene' ba ben da' mal še bina' güe'e diža' naquen' goc na' še bina' nezecho bi dan' bene'.

⁵² Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdo' ne to bene' choe' xtiža' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaque'.

No'olen' besyedole'de' len xtoe'

8 ¹ Na' Jesúsen' gweje' ya'a da' nzi' Ya'a Olivos. ² Na' beteyo cate' gwyeni' gweje' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzolagüe' chsed chlo'ede' legaue'. ³ Nach bene' chososed chosolo'e ley dan' bzoj da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozechel' le' gachol' bene' ca' chosozenag che Jesúsen'. ⁴ Na' gose'e Jesúsen':

—Maestrw, no'ole nga ba bedole'to' delene' xtoe'. ⁵ Na' ley chechon' da' bzoj Moisésen' žan cheyala' gotcho no'ol ca' cheson ca' gwchelchone' yej. Na' ¿bi žo' le'? ¿bix cheyala' gonechone'?

⁶ Gose'e Jesúsen' ca' da' gosaclače' yesebeje' le' diža' da' yosochine' yesagüe' xya che'. Na' Jesúsen' con bcheque' bzoje' lo yon' len xbene'. ⁷ Na' bene' ca' gosone' byen gosenabchde' le' bi že'. Nach Jesúsen' bebešagüe' na' gože' legaue':

—Guaque con note'tezle bi de xtola'le solaole gwchellene' yejen'.

⁸ Nach bcheque' da' yoble bzojche' lo yon'. ⁹ Na' bene' ca' zjanche' no'olen' cate' gosende' can' gož Jesúsen' legaue', zjanезде' lecze ba zjanoncze' da' xinj, nach tgüeje' tgüeje' besyechoje' gwzolaotequen' len bene' golech na' bžinten len bene' xcuide'ch, nach bega'an' yetoze no'olen' len Jesúsen' gan' že' bene' ca' chsed chlo'ede'. ¹⁰ Nach Jesúsen' bebešagüe' da' yoble na' ble'ede' noch no bene' ca' zjanla' na' gože' no'olen':

—No'ole, ¿ganxe bene' ca' chosocuiš le'? ¿Ne toe' bi beñ le' castigw?

¹¹ Na' no'olen' gože'ne':

—Ne toe', bene'.

Na' Jesúsen' gože'ne':

—Ne neda' bi gona' le' castigw. Beyej na' bich gono' da' malen'.

Jesúsen' nse'e be'ni' che yichjlaždao' beñach

¹² Jesúsen' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' beñachen'. Bene' zjanaque' neda' txen bich zjanaque' ca' bene' yichjlaždao' lchol' bene' cheson da' xinj, san lo' yichjlažda'ogaque' naquen ca to da' yo'o be'ni'. Da'nana' ba de yela' mban chegaque' toli tocane.

¹³ Nach bene' fariseo ca' gose'e Jesúsen':

—Cho'o diža' che cuino' naco' bene' zaca', na' da'nana' bi naquen to da' yesejle' bene'.

¹⁴ Na' gož Jesúsen' legaue':

—La'czla' cho'a diža' che cuina', xtižan' naquen da' li. Neda' nezda' gan' gwza'a na' gan' yeya'a, perw le'e bi nezele gan' za'a na' gan' yeya'a. ¹⁵ Le'e chosbaga'le neda' con can' chon beñachen' xbab, san neda' nono chosbaga' bi da' yosbaga'. ¹⁶ Perw na' šaca' bi da' yosbaga' bene', gonan'

ca cheyala', le bibi de da' chona' to gualaza', san chona' dan' ža Xan' ben' gwsela' neda'. ¹⁷ Ley chechon' dan' chsedlen' žan cheyala' šejle'cho cate' chedil diža' da' chesoe' chope testigw. ¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwsela' neda' lecze cho'e diža' chia'.

¹⁹ Na' gose'ene':

—¿Gaxe zoa xaon'?

Na' gwna Jesúsen':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

²⁰ Diža' ca' bsed blo'e Jesúsen' cate' ze' gala'ze gan' chesegüe'e mechw lo' yodao' blao che neto' bene' Israel. Na' nono gwzen le', le bina' žin ža gaque' lo' na' bene' chesegue'ede' le'.

Jesúsen' gože' legaque' bi gac šjaya'aque' gan' yeyejen'

²¹ Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le bina' yetinjele xtola'len' cate' žin ža gatle.

²² Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

²³ Nach Jesúsen' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

²⁴ Da'nan' gwnia' bina' yetinjele xtola'len' cate' žin ža gatle. Le še bi šejle'le neda' naca' doxen can' gwnian', gatle bina' yetinjele xtola'len'.

²⁵ Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'. ²⁶ Ne' dech da' zan da' nia' cont gwzejni'ida' le'e naple dola'. Perw bene' gwsela' neda' nezde' yogo'lol na' cho'e diža' li, na' neda' choe'lena' benachen' diža' da' ba benda' gwne'.

²⁷ Bene' gwnabia' ca' bi gosejni'ide' choe'lene' legaque' diža' che Xe' Diosen'. ²⁸ Nach Jesúsen' gože' legaque':

—Cate' ba gwde gwlisle neda' to le'e yag, neda' naca' bene' gwsela' Diosen' golja' benach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenna' žia'. ²⁹ Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

³⁰ Na' šlac Jesúsen' choe'lene' bene' ca' dižan' nach bene' zan gosezolao chesejnilaže' le'.

Bene' ca' chnabia' da' malen' yichjlažda'ogaquen'

³¹ Nach Jesúsen' gože' bene' gualaž cheto' ca' bach gosezolagüe' chesejnilaže'ne':

—Še soaczle gonle can' ba gwnian', gwlo'en da' li nacle txen len neda'.

³² Na' še soaczle gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

³³ Bał bene' ca' gose'e Jesúsen':

—Neto' nacto' diaža che da' Abrahanna' na' nono na' soa bene' nabia' neto'. ¿Bixchen' žo' yechojto' lo na' da' chnabia' neto'?

³⁴ Na' gož Jesúsen' legaque':

—Chnia' le'e to da' zejen, yogo' bene' cheson da' xinj zjanaque' lo na' da' mal da' chnabian' legaque'. ³⁵ Bene' zoa liž xan xšine' bi naque' xi'in ben' gan' chone' žinna', san šlož güejze zoe' txen len legaque' len bi da' chesone'. San bene' golje' txen len le', bate'teze zoe' len legaque'. ³⁶ Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle. ³⁷ Nezda' nacle diaža che da' Abrahanna', perw bia'cze cheyiljwlaže'le nac gonle cont gotle neda'. Na' chonle ca' da' bi chzenagle xtižan'. ³⁸ Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

³⁹ Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'. ⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyiljwlaže'le nac gonle gotle neda'. Da' Abrahanna' bi bene' can' chonlen'. ⁴¹ Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

⁴² Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. ⁴³ ¿Bixchen' bi chejni'ile dan' chnia' le'e? Nezda' bi chejni'ile dan' bi chaclaže'le gwzenagle chia'. ⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. ⁴⁵ Na' neda', da' cho'a diža' li, bi chejle'le chia'. ⁴⁶ Bibi da' mal nona' na' da'nan' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? ⁴⁷ Bene' ca' chon Diosen' legaque' cuent ca

xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach bene' gwnabia' che nación Israel cheton' gose'e Jesús'en':

—Can' ba gwnacztó' nacia'cze naco' txen len bene' Samaria ca' na' yo'o to da' xigüe' lo' yichjlažda'oguoñ' chonen ga chol chñenošo'.

⁴⁹ Jesús'en' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chnele chia'. ⁵⁰ Bi chyiljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele naple doła' da' chnele chia'. ⁵¹ Chnia' le'e to da' zejen, note'teze bene' yosozenague' xtižan', guata'cze yela' mban che' toli tocanē.

⁵² Nach da' yoble bene' gwnabia' ca' gose'e le':

—Nach beyož gwnezeto' yo'o to da' xigüe' lo' yichjlažda'oguoñ' chonen ga chol chñenošo'. Ba got da' xoxxta'ocho Abrahanna', na' len bene' ca' goso'e xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban che' toli tocanē. ⁵³ ¿Chacdo' zaca'cho' ca da' xoxxta'ocho Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

⁵⁴ Gož Jesús'en' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'. ⁵⁵ Le'e bi nombia'lnē', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'. ⁵⁶ Da' Abrahanna' ben' žale nac xoxxta'ole bebechgüede' gwnezde' le'ede' ba za'a len benachen' na' zoe' mbalaz ba ble'eden'.

⁵⁷ Na' gose' bene' blao che nación Israel cheton' le':

—Bina' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesús'en' gože' legaque':

—Chnia' le'e to da' zejen, ba zoacza' neda' cate' bina' galje Abrahanna'.

⁵⁹ Nach gosenize' yej da' yosochele' le', perw Jesús'en' bcuaše' na' beze'e yodaon'. Neca gosacbe'ede' cate' bedie' ladjogaque'.

Jesús'en' bene' cont ble'e to bene' golje' nchole'

9 ¹ Txen zej Jesús'en' len bene' ca' zjanaque' le' txen cate' besele'ede' to bene' byo golje' nchole'. ² Na' gose'e Jesús'en':

—Maestrw, ¿non' nap doła' golje benga nchole', še le' o še xaxne'en?

³ Na' Jesús'en' gože' legaque':

—Benga golje' nchole' gague da' nape' doła' na' gague da' zjanap xaxne'en doła', san golje' ca' cont le'ele can' chon Diosen'. ⁴ Cheyala' goncho xšin Dios ben' gwsela' neda' šlac ne' de latje. Gwžin ža bich gala' gonchon. ⁵ Šlac ne' zoa' yežlion' chgua'a be'ni' lo' yichjlaždao' benachen'.

⁶ Beyož gwne' ca' gwcho'on xene' lo yon' na' bene' late' gona' len xene' na' gwdebe' gonan' yejlao bene' lcholen'. ⁷ Nach gože' ben':

—Gwey jaydib yejlaguon' cho'a yel da' nzi' Yel Siloé.

(Na' Siloé zeje diža' Nselā'.) Na' gweyeje' na' beyib yejlagüen' na' cate' beze'e zjayde' ba chle'ede'. ⁸ Na' bene' gualiž che' na' nochle bene' ba besele'e le' yogo' ža cate' ne' ncholen' gosene':

—¿Gague bengan' ba ble'echo chbe' chnabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': “Gwey cho'a yel da' nzi' Yel Siloé na' jaydiben'.” Na' gwy'a na' beyiban' na' gwzolao chle'eda'.

¹² Nach gose' bene' ca' le':

—¿Ganxe bena'?

Na' gože' legaque':

—Bi nezda'.

Bene' fariseo ca' gosenabyože' nac goquen' ba chle'ede'

¹³ Nach goseche'e ben' goc lcholen' gan' že' bene' fariseo ca'. ¹⁴ Nac to ža che Dios caten' Jesús en' bene' gonan' dan' gwdebe' yejlao bena' cont ble'ede' na' bi de lsens gon neto' bene' Israel žin ža che Diosen'. ¹⁵ Na' bene' fariseo ca' lecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

¹⁶ Nach bal bene' fariseo ca' gosene':

—Nezecho bi zoa Diosen' len bena' beyone' bene' lcholen', le chone' da' bi cheyala' gone' ža che Diosen'.

Na' yebale' gosene':

—¿Nac gon to bene' güen da' xinj gone' yela' guac ca dan' ben benga?

Na' legacze' besechoje' chop cuen. ¹⁷ Na' da' yoble gose'e ben' golje' nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiža' Dios.

¹⁸ Na' bene' gwnabia' che naci3n Israel cheton' bi gosejle'e golje ben' nchole' na' na'a bach chle'ede'. Nach gosaxe' xaxne'ena'. ¹⁹ Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

²⁰ Xaxne'ena' gose'e legaque':

—Nezeto' bengan' xi'into', na' nezeto' golje' nchole'. ²¹ Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

²² Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglagüen' bi yosolebe' lo' yodaon' note'teze bene' güe'e diža' chejle'e Jesús'en' naque' Cristo ben' chesebeze' yedenabi'e.

²³ Da'nan' xaxne'en gosene': “Ba zejeczede', le nabe cuine'.”

²⁴ Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen' can' gwnao' bache. Nezeto' ben' gwnao' beyon le' naque' bene' güen da' xinj.

²⁵ Na' ben' beyac yejlagüen' gwne':

—Bi nezda' še naque' bene' güen da' xinj o še bi naque'. Da' nezda', goca' bene' lchoł na' na'a ba chle'eda'.

²⁶ Na' da' yoble gose'e le':

—¿Bi bende' le? ¿Nac benen' chle'edo'?

²⁷ Na' gože' legaque':

—Ba gwnicza' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés. ²⁹ Nezeto' Diosen' be'lene' Moisés'en' diža', perw benga bi nezeto' ga ze'e.

³⁰ Na' ben' golje' nchole' gože' legaque':

—iDa' zaca' yebanecho, bi nezele ga za' benga, na' bene' cont chle'eda'! ³¹ Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalažen'. ³² Na' gwzolaoten cate' gwxe yežlion' bina' yenecho zoa bene' chac chone' cont chle'e bene' golje' nchole'. ³³ Šaca' bengan' bi ze'e gan' zoa Diosen' bibi gac gone'.

³⁴ Bene' fariseo ca' beselocchgüe' na' gose'e le':

—Len' goljtio' naco' bene' mal juisyw, ¿chacdo' zaco' gwseddo' neto'? Na' besyebeje' le' lo' yodaon'.

Bene' ca' zjanchoł yichjlažda'ogaque'

³⁵ Jesús'en' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwselen'?

³⁶ Na' gož ben' le':

—Bene', gwna neda' non', cont šejnilaža'ne'.

³⁷ Jesús'en' gože'ne':

—Nedan' ben' ba ble'eczede' na' nedan' choe'lena' le' diža'.

³⁸ Nach bena' bzoa xibe' benxene' Jesús'en', gwn'e':

—Xana', chejnilaža' le'.

³⁹ Nach Jesús'en' gwn'e':

—Za'a yežlio nga cont gata'bia' non' nap doła' na' non' bi nap doła'.

Zedeyena' cont bene' ca' bi chesejni'i bich yesaque' ca bene' lchol, na' zedeyena' cont bene' ca' chesacde' chesejni'ide' yesaque' ca bene' lchol len yichjlažda'ogaquen'.

⁴⁰ Nach bał bene' fariseo ca' nita' gała'ze caten' gwn'e' ca' na' gosende' xtižen', gose'e Jesús'en':

—¿Chacdo' len neto' nacto' ca bene' lchol?

⁴¹ Nach Jesús'en' gože' legaque':

—Šaca' nacle ca bene' lchol, bibi xtoła'le de, san žale chejni'ile, na' da'nan' naple doła'.

Jempl che bene' güeye' xila' ca'

10 ¹ Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban. ² Ben' chsaljue' na' cho'e cho'a puerten', len' güeyoe' xilan'. ³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'. ⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en. ⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesús'en' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jesús'en' zaca'lebde' ca to bene' chyoe' xila' čhen' binlo

⁷ Nach Jesús'en' bsed blo'echde' legaque' yeto, gwn'e':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'. ⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'.

⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban chegaque' toli tocane na' soacza' gaclena' legaque' bite'tez da' cheseyažjde'.

¹⁰ 'Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yela' mban toli tocane che bene' chesejnilaže' neda' cont nite'

güenchgua. ¹¹ Neda' binlo chgüia chña'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nži'ida' legaue', da'nana' chzane cuina' gata' neche legaue'. ¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be chegaue'. Cheso'e latje chñiz beco'yon' xila' ca' na' chesoslasba' legacba'. ¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaue', san chosoyoeba' dan' chesezi' laxjue'.

¹⁴ 'Neda' binlo chgüia chña'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a bene' ca' chesejnilaže' neda' na' legaue' zjanombi'e neda'. ¹⁵ Nombi'a legaue' ca Xan' nombi'e neda' na' neda' nombi'a Xan'. Na' da' nži'ida' legaue' chzane cuina' gata' neche legaue'. ¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyała' šjatoba' legaue' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'löle'.

¹⁷ 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. ¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo bene' guaten', can' non Xan' mandadw gona'.

¹⁹ Na' da' yoble bene' nación Israel cheton' besechoje' chople neche xtiža' Jesúsena'. ²⁰ Zane' gosene':

—Yo'o da' xigüen' yichjlažda'ogüe', nan' chol chnenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol'?

Bene' gwnabia' che nación Israel besegue'ede' Jesúsena'

²² Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blao che Diosena', ba bžin tiemp zag Jerusalénna'.

²³ Na' Jesúsena' chde' chašil che yodao' blaon' gan' nzi' Chašil che Salomón. ²⁴ Na' bene' gwnabia' che nación Israel cheton' gosechje' Jesúsena' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' sela' Diosena' cont yedenabi'e nación chechon'? Še len' Criston', gwnatega neto' zaca'lao.

²⁵ Na' gož Jesúsena' legaue':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'. ²⁶ Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e. ²⁷ Nombi'a bene'

chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'. ²⁸ Na' chnežjua' legaque' yela' mban toli tocane na' gwbat yesebiaye'e na' nono gac yesyeca'a legaque' lo na'. ²⁹ Xan' ba gwleje' bene' ca' chesejnilaže' neda' cont chgüia chna'a legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen. ³⁰ Neda' na' Xan' toz bene' nacto'.

³¹ Beyož gwne' ca' bene' gwnabia' ca' gosenize' yej cont yosochelenen'.

³² Na' gož Jesúsen' legaque':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

³³ Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chneya'o che Diosen'. Con benachze le' na' chon cuino' ca Dios.

³⁴ Na' gož Jesúsen' legaque':

—Nezeczzele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.” ³⁵ Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'. ³⁶ Diosen' gwleje' neda' cont gaclena' benachen' že' yežlio nga na' čnacxechen' ža le'e chneya'a che Diosen' da' žia' naca' Xi'ine'? ³⁷ Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'. ³⁸ Perw še chacbe'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

³⁹ Nach da' yoble gosaclačže' yesezene' Jesúsen' perw bitw bdole'.

⁴⁰ Jesúsen' beyeje' jayzoe' yešla'a yegw Jordanna' latje gan' gwzoa da' Juanna' šlac ne' chzoe' bene' nis. ⁴¹ Na' bene' zan ja'ac gan' gwzoen' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benga naquen da' li.

⁴² Na' bene' zan gosejnilaže' Jesúsen' latje na'.

Can' goc cate' got Lázaro

11 ¹⁻² Na' gwzoa to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'. ³ Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

⁴ Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

⁵ La'czla' Jesúsen' chacde' Martan' len bene' bilen' na' len Lázaron',
⁶ cate' gwnezde' chacšene Lázaron', bega'anche' yechope ža gan' zoen'.

⁷ Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸ Na' gose'ene':

—Maestrw, bi ža na'zen' bene' gwnabia' che nación chechon' gosaclačže' yesote' le' yosochele' le' yej. ¿Da' yoble šejo' na'?

⁹ Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chčhegüe', le nseni' gwbižen' lo yežlion'. ¹⁰ Na' bene' chda ba gol chčhegüe', le nac chol.

¹¹ Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

¹² Na' gose'ene':

—Xanto', še ba chtase' güeyacczede'.

¹³ Jesúsen' gwne' ca' dan' gwnezde' ba got Lázaron', na' bene' ca' zjanaque' Jesúsen' txen gosacde' še chtaszen'. ¹⁴ Nach Jesúsen' bochixgaten' bi zejenna' gwne' ca':

—Ba got Lázaron'. ¹⁵ Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

¹⁶ Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' bene' guat

¹⁷ Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. ¹⁸ Betanian' chin' gala'ze Jerusalénna' ca do gašjw hor. ¹⁹ Na' bene' zan bene' gualaž čhegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'. ²⁰ Nach Martan', cate' gwnezde' Jesúsen' ba bžine' cho'a yežen', na' gwze'e jašague'ne'. Na' Marían' bega'ane' yo'ona'. ²¹ Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'.

²² Na' nezda' la'czla' ba gote', bite'tez da' nabdo' Diosen' gone', gonzcen'.

²³ Nach gož Jesúsen' le':

—Güeban bene' zanon'.

²⁴ Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

²⁵ Na' gož Jesúsen' le':

—Neda' chac chosbana' bene' guat ca' le nsa'a yela' mban toli tocanē. Da'nan' bene' ca' yesejnilaže' neda', la'czla' yesate', guata' yela' mban čhegaque' toli tocanē. ²⁶ Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷ Na' gož Martan' le':
—Xana', chejli'a naco' dogualje Xi'in Dios. Chejli'a naco' Criston' ben'
ba gwlezto' seła' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šižize:
—Ba bla' Maestron' cho'a yežen' na' chnie' le'.
²⁹ Na' Marían' cate' bende' dan' gož Martan' le' la' gwza'te' na' gwyeje'
gan' zoa Jesúsen'. ³⁰ Bina' žin Jesúsen' lagüe yežen' ca horen', ne' nga'ane'
cho'a yežen' gan' jašag Martan' le'. ³¹ Na' bene' Jerusalén ca' nita' liž
María, bene' cheso'e le' yela' chxenlaže' da' got bene' zanen', cate'
besele'ede' gwza' Marían' nach gosa'aclene' le', gosacde' zeje' cho'a
blojen' gan' ngaše' zjačeže'.
³² Na' Marían' cate' bžine' gan' zoa Jesúsen' na' ble'ede' le', la' bzoate
xibe' lagüen', gože'ne':
—Xana', šaca' zo' nga caten' gocšene da' bene' zanan', bilja gote' šaca'.
³³ Na' cate' ble'e Jesúsen' chbež Marían' na' lecze chesebež bene'
Jerusalén ca' za'aclene' le', da' juisyw da' goque Jesúsen' na' bžaglagüe'
lo' yichjlažda'ogüen'. ³⁴ Na' gože' legaque':
—¿Ga bcuaše'lene'?
Na' gose'e le':
—Xanto', yo'o na' le'edo'.
³⁵ Na' gwchež Jesúsen'. ³⁶ Na' bene' Jerusalén ca' gosene':
—Le na' catequen' chacde' le'.
³⁷ Na' bale' gosene':
—Bengan' bene' ga ble'e bene' lcholen', na' šaca' gwzoe' nga caten'
gocšene Lázaron', benlje' cont bi gote'.

Jesúsen' bosbane' Lázaron' ladjo bene' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na'
gwyeje' gan' bosocuaše' ben'. Naquen to bloj na' da' to yej cho'enna'.
³⁹ Na' Jesúsen' gože' bene' ca':
—Le ca'a yejen'.
Na' Martan' bene' zan da' Lázaron' gože'ne':
—Xana', ba chla' ben' zigw, le bačh goc tap ža gote'.
⁴⁰ Na' gož Jesúsen' le':
—Ba gwnia' le' še šejnilažo' neda' na' le'edo' nac Diosen' bene' zaca'
juisyw.
⁴¹ Nach bene' ca' goseque'e yejen'. Na' Jesúsen' gwne'e yabale na'
gwne':
—Xa', choxcleno' ba bzenago' chia'. ⁴² Nezda' yogo' ni'a chzenago'
chia', perw žia' ca' cont bene' ca' že' nga yesejle'e len' gwseło' neda'.
⁴³ Beyož bol' güiže' Diosen', gwne' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsén' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsén'

(Mt. 26:1-5; Mr. 14:1-2; Lc. 22:1-2)

⁴⁵ Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsén' na' gosejnilaže'ne'. ⁴⁶ Perw bal bene' Jerusalén ca' ja'aque' lao bene' fariseo ca' na' jaseže' legaque' Jesúsén' bosbane' Lázaron'. ⁴⁷ Nach b̄xoz gwnabia' ca' che neto' bene' Israel len bene' fariseo ca' bosyotobe' yogo'lo bene' ca' chesenabia' nación cheton'. Na' bosoxi'e gosene':

—¿Nac goncho? le yela' guac zan chon benga. ⁴⁸ Na' še n̄acho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

⁴⁹ Na' to bene' gwnabia' zoa ca horen' le' Caifás. Le' naque' b̄xoz blao lo izen'. Na' gože' legaque':

—Le'e gague bi nezele. ⁵⁰ Na' bi chache'ele napen chio' cuent toz ben' gat, clél ca cuiayi' yogo'cho lente nación checho nga.

⁵¹ Gague con ca gwnalaže'ze Caifásén' gwne' ca', san da' naque' b̄xoz blao iznan', Diosén' bene' ga gwne' ca' cont gwdixjue'ede' gat Jesúsén' neche nación cheton'. ⁵² Na' ca nac dan' gaten', gague gate' neche nación cheton' na'zen' san gate' cont yogo' bene' ba gwlej Diosén' yesaque' xi'ine' gate'teze nación, yesaque' txen yesejnilaže'ne'. ⁵³ Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsén'.

⁵⁴ Na' da'nan' Jesúsén' bich gwdacze' con can' n̄la'ze gan' že' bene' gwnabia' che nación cheton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gala'ze latje dašen', na' besyega'ane' na'.

⁵⁵ Na' ba zoa gala' lni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gala'le lnin' cont yeson cuine' xilaže' can' ža ley cheton'. ⁵⁶ Na' besyeyiljue' Jesúsén' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni nga, še bi yide'?

⁵⁷ Gosene' ca' le b̄xoz gwnabia' cheton' ca' na' bene' fariseo ca' ba gosechoguen' še note'tez bene' nezde' gan' zoa Jesúsén' cheyala' gwzende' legaque' cont yesezene' le'.

Marían' chgüe'e set zix̄ ni'a Jesúsén'

(Mt. 26:6-13; Mr. 14:3-9)

12 ¹ Na' yexop ža za' gala' lni pascon', Jesúsén' gwche'e bene' ca' zjanaque' le' txen yež Betanian' gan' zoa Lázaron' ben' bosbane'

ladjo bene' guaten'. ² Na' bal bene' Betanian' bososini'e to xše' da' gwdagw Jesúsén' cont gosonxene'ne'. Na' Martan' bdie' yela' guagw na' Lázaron' gwche'lene' bene' ca' cho'a mesen' txen len Jesúsén'. ³ Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xni'a Jesúsén' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chgwan ze set zixen'. ⁴ Na' Judas Iscariote xi'in to bene' le' Simón, le' naque' to bene' šižinw ca' zjanaque' Jesúsén' txen, na' len' ba naquen gwdie' Jesúsén' lo na' bene' ca' chesegue'ede' le'. Na' Judasen' gwne:

⁵ —¿Bixchen' bi bete' seten' na' gone' mechon' cont gaclenen bene' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' bene' yašen' san da' goque' bene' gwban. Len' bexue' mechw da' bosochin yogüe' na' gwlejlane' mechon'. ⁷ Nach Jesúsén' gože'ne':

—Bibi ye'lné', le ba bene' da' non gone' len neda' che ža cate' gaša'.

⁸ Bene' yaše' ca' nita'cze' len le'e bate'teze, san neda' bich soacza' yesša len le'e.

Bxoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaž cheton' gosenezde' zoa Jesúsén' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo bene' guaten'. ¹⁰ Na' bxoz gwnabia' che nación Israel cheton' bosoxi'e lecze yesote' Lázaron', ¹¹ le bene' zan bene' Israel ba chesyecuase' len legaque' na' ba chesejnlaže' Jesúsén' dan' gosenezde' bosbane' Lázaron'.

Jesúsén' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsén' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lnin', na' zane' cate' gosenezde' žin Jesúsén' Jerusalénna', ¹³ besežaše' jaseleze' le' zjanoxe' no zin. Na' chesegüe'e lban' che', chesene':

—iLeca bene' zaca' benga! Mbalaz ben' za' nga nselá' Xancho Diosen' le' cont nabi'e. iMbalaz bene' naque' Rey che nación Israel chechon'!

¹⁴ Na' bžel to burr dao' be gwžia Jesúsén', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble;

le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsén' txen gague cate gosejni'ide' chac con can' bosozoj ben' goso'e xtiža' Diosen' cani'. Beyož got Jesúsén' na' goc yogo' da' ca' gosaquen' cont bla'lagüe le Jesúsén' naque' bene' zaca'

juisyw, cana'ch jasyeza'laže' diža' ca' da' zjanyoj che Jesús'en' na' gosejni'iden'.

¹⁷ Bene' ca' besele'e cate' Jesús'en' bol' güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'. ¹⁸ Na' da'nan' bene' zan jaseleze' Jesús'en' da' ba gosende' diža' che yela' guac dan' bene' bosbane' Lázaron'. ¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosenabe' yesoe'lene' Jesús'en' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo l_nin'. ²¹ Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesús'en' diža'.

²² Na' Felipen' gwyeje' jan'e' Andrésen' nach choptie' jaseže' Jesús'en' ca'. ²³ Nach Jesús'en' gože' legaque':

—Na'a ba bžin hor gac yogo'lol da' cheyala' gac cont la'lagüe naca' bene' zaca' juisyw. ²⁴ Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonen. ²⁵ Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocañe. ²⁶ Na' note'tez bene' chesaclaže' yesone' xšinan', cheyala' yesejnilaže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesús'en' gwdixjue'ede' yesot bene' le'

²⁷ 'Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach bol' güiže' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len le' cont chesacbe'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne'. Na' yeba'le' gosene':

—To angl gwne' le'.

³⁰ Na' Jesús'en' gwne':

—Diosen' gwne' neda' zižje gague cont nežda' neda' chzenague' chia' san cont neze le'e. ³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na'

dan' chnabia'te bene' ca' bi chosozenag che Diosen' solao nit yela' chnabia' chen. ³² Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

³³ Gwne' ca' cont gosenezde' yesot bene' le' yosode'ene' to le'e yag cruz.

³⁴ Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e naci6n chechon' soe' toli' tocane. Na' le' ĩbixchen' žo' naco' bene' gwseła' Dios goljo' benach na' žo' yesote' le' to le'e yag cruz še ca'? ĩNox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' le'e. Ben' chda gan' nac chol' bi chacbe'ede' gan' zeje'. Can' naquen len le'e. ³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesúsen'

³⁷ Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'. ³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton',
na' nono chesacbe'e blo'o yela' guac chion'.

³⁹ Bi goc yesejle'e, le goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena. Ba bene' cont chesele'ede' na' bi zjanezde' bi zejen, na' bi chesacbe'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesacbe'ede' bi zejen dan' chlo'eda' legaque', ba besyetenjde' na' ba beca'a xtoła'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

⁴² Na' la'czla' zanch bene' Israel gualaž cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi goso'e diža' chesejnilaže'ne' le besežebe' bich yosoleb bene' fariseo ca' legaque' lo' yodaon'. ⁴³ Gosaclače'che' yesenite' binlo len benachen' clel ca yesenite' binlo len Diosen'.

Xtiža' Jesúsen' naquen da' žialao

⁴⁴ Nach Jesúsen' gwne' zižje gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwseła' neda'. ⁴⁵ Na' bene' chne'e neda' chle'ede' bene' gwseła' neda'.

⁴⁶ Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'. ⁴⁷ Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' benachen', san za'a cont gwnežjua' yela' mban toli tocanē che bene' yesejnilaže' neda'. ⁴⁸ Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'. ⁴⁹ Gague bia' diža' to gualaza', san Xa' ben' gwseła' nedan' none' mandadw bin' cheyala' nia' na' bin' cheyala' gwsed gwlo'eda'. ⁵⁰ Na' nezda' dan' none' mandadw nia' nsan' yela' mban toli tocanē che bene' yosozenag chen. Na' da' li, con can' ža Xan', can' choe'lena' le'e diža'.

Gwdib Jesúsen' ni'a bene' ca' zjanaque' le' txen

13 ¹ Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' bene' ba chejnilaže' le' lo yežlio nga. Da'nana' za' gala' lni pascon' bzejni'ide' bene' ca' zjanaque' le' txen, le chacyane'czede' legaue'.

² Bach gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo na' bene' ca' chesegue'ede' le'. Na' ba zjanite' chesagüe' xše'. ³ Na' Jesúsen' nezde' Xen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'. ⁴ Da'nana' gwzože'e cate' ba chesyedagüe' xše' na' gwlechje' xe' da' nyaze' cha'le na' gwxi'e to lache' da' bchej lsinen'. ⁵ Nach gwxi'e nis na' gwde'en to lo' ša' na' gwzologüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nchej lsinen'.

⁶ Na' cate' ba zoa chibe' ni'a Simón Pedro, Pedron' gože'ne':

—Xana', žle' chibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' chibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen chibe', le doxen cuerp chen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwnezde' non' gwde' le' lo na' bene' chesegue'ede' le'. Da'nana' gwne': “Gague yogo'le nac lažda'olen' xilaže.”

¹² Na' cate' beyož gwdibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e? ¹³ Le'e nsi'le neda' Maestrw na' Xanle, na' güenczen' žale, le can' naca'. ¹⁴ Na' neda' la'czla' naca' Xanle na' Maestrw chele, ba gwdiba' ni'alen' ca to mos, na' can' cheyala' gaclen lježle ca to mos. ¹⁵ Ba gwdiba' ni'alen' cont blo'eda' le'e cheyala' gonle can' ba benan'. ¹⁶ Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwsela' le'. ¹⁷ Še chejni'ile da' quinga na' gonle can' gwnian', nach soale mbalaz.

¹⁸ 'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Bene' gwdagw len neda' txen ba blej bšošje' neda'." ¹⁹ Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwsela' Diosen' can' ba gwnia' le'e. ²⁰ Chnia' le'e to da' zejen, bene' ca' chosolebe' note'tez bene' chsela', neda'czen' chosolebe' še ca', na' bene' chosolebe' neda' lecze chosolebe' Dios bene' gwsela' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

²² Na' bene' ca' zjanaque' le' txen con chesena' cho'alao lježe' chesone' xbab che noen' gwne' ca'. ²³ Na' toe' chi'e cuiten' dan' chaquechgüe' Jesúsen' le'. ²⁴ Nach Pedron' bene' señw len bena' cont gwñabde' Jesúsen' no chen' gwne' ca'. ²⁵ Nach gwbigue' bago gože' Jesúsen':

—¿Non' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjue' Judas Iscariote bene' nac xi'in to bene' le' Simón. ²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

²⁸ Na' ne to ben' zjachi' cho'a mesen' bi gosejni'ide' bixchen' gože' le' ca'. ²⁹ Bale' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo lñin' o šjanežjue' mechw da' chyažje no bene' yaše'. ³⁰ Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba goł gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' benach na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw.

³² Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. ³³ Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda' gan' yeya'an. ³⁴ Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole. ³⁵ Na' yeseneze yogo'lol bene' nacle neda' txen še soaczle gaque lježle tole yetole.

Jesúsen' gwne' Pedron' bi chebe' nombi'ene'

(Mt.26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixchen' bi gac sa'lana' le' na'a? Gwzanlaže' cuina' gata' še chonen byen cont gaclena' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

Bene' chesejnilaže' Jesúsen' lecze zjanombi'e Xe' Diosen'

14 ¹ 'Bich gacžejlaže'le. Le šejnilaže' Diosen' na' lecze le šejnilaže' neda'. ² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che tole. ³ Na' cate' yeyož šjajenšagua' yo'o chele ca', cana'ch yida' da' yoble yechi'a le'e cont yedyezoale gan' šjayzoa' neda'. ⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' bene' yela' mban toli tocanē. Ne toze bene' bi yežine' gan' zoa Xan' še bi šejnilaže' neda'. ⁷ Še nombia'yane'le neda', lente Xan' ba nombia'le še ca'. Na' bach nombia'lnē' na'a na' ba ble'elne'.

⁸ Na' gož Felipen' le':

—Ben cont le'eto' X̄aon', lezen' chnabeto' le'.

⁹ Jesús'en' gože'ne':

—Felipe, sša xen ba gwzoa' nga len le'e na' ÷bina' gombi'o neda'? Note'tez bene' ba ble'e neda' lencze X̄an' ba ble'ede'. ÷Bixchen' chnabo' gona' cont le'ele X̄an'? ¹⁰ ÷Bi chejli'o zoa' len X̄an' na' le' zoe' len neda'? Diža' da' choa' len le'e bi choan' to gualaza'. X̄a' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. ¹¹ Le šejle' chia' zoa' len X̄an' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. ¹² Na' chnia' to da' zejen, bene' ca' chesejnilaže' neda', da' ca' chonan' lecze legaquen yesone'. Na' da' zaca'ch ca da' ca' yesone', le yeya'a gan' zoa' X̄an'. ¹³ Na' bite'teze da' nabele X̄an' lagüe da' chejnilaže'le neda' naca' Xi'ine', gonan', cont gwlo'a nac X̄an' bene' zaca' juisyw. ¹⁴ Bite'tez da' nable gona' lagüe da' chejnilaže'le neda', neda' gonan'.

Jesús'en' gwne' sele' Spiritw che Diosen'

¹⁵ Še chaquele neda', gonle can' nona' mandadw. ¹⁶ Na' nabda' X̄an' cont sele' Spiritw chen' soan len le'e toli tocane na' gaclenen le'e. Na' Spiritw che Diosen' gwzejni'in le'e da' nac da' li. ¹⁷ Na' bene' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e. ¹⁸ Bi yocua'ana' le'e ca bi' güezebe. Güidcza' yeto gan' zoale nga. ¹⁹ Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocane, da'nan' soale toli tocane. ²⁰ Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len X̄an' na' le'e zoale len neda' na' neda' zoa' len le'e. ²¹ Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque X̄an' legaque', na' neda' lecze soa' gacda' legaque' na' gona' cont yesombia'che' neda'.

²² Na' Judas (perw gague Judas Iscariote) gože'ne':

—X̄anto', ÷bixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

²³ Na' Jesús'en' gože'ne':

—Bene' chesacde' neda' chosozenague' xtižan', na' X̄an' lecze gacde' legaque' na' neda' len x̄an' yedesoa' len legaque'. ²⁴ Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža X̄an' ben' gwsela' neda'.

²⁵ 'Da' quinga ba gwnia' le'e šlac ne' zoa' len le'e. ²⁶ Na' X̄an' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyala' nezele na' gonen cont šjayza'laže'le yogo' dan' ba gwnia' le'e.

²⁷ 'Na' hcua'ana' le'e na' chona' cont soa cuezle binlo len xbab chelen'. Chaclača' soa cuezle binlo len xbab chelen' can' zoa' neda'. Nono benach gac gone' cont soa cuezle binlo len xbab chelen' can' chac chona' neda'. Bi gaczejlaže'le, neca žeble. ²⁸ Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa Xan', le Xan' zaca'che' ca neda'. ²⁹ Na' ba gwnia' le'e na'a bibi na' gac, cont soachachle šejnilaže'le neda' caten' gac ca'.

³⁰ 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tillenen neda', perw bi gonen neda' gan. ³¹ Chona' con can' non Xan' mandadw cont neze benachen' chacda' Xan'. Le šo'o na'a, ba gole šejcho.

Jesúsen' zaca'lebe' ca to yag da' chbia uvas

15 ¹ 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'. ² Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. ³ Na' le'e ba nacle ca to xozen' da' ba mpe'e, le bach chzenagle xtižan' dan' ba be'lena' le'e. ⁴ Le soachach len neda' cont soachacha' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soachachle len neda'.

⁵ 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soachachle len neda' lecze soachacha' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. ⁶ Bene' bi zoachache' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont cheseyen.

⁷ 'Na' le'e še zoachachle len neda' na' zoachachle chzenagle xtižan', bite'tez da' chaclače'le nabele Diosen', gonczen'. ⁸ Chacxen Xan' cate' zoale chonchguale dan' chazlažen', na' še chonle ca', yesacbe'e bene' da' li chejnilaže'le neda' na' chzenagle chia'. ⁹ Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e. ¹⁰ Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

¹¹ 'Ba gwnia' le'e ca' cont soale mbalaz ca mbalazen' zoa' neda'. Chaclača' soale mbalaz juisyw. ¹² Na' da' nga nona' mandadw gonle, gaque lježle tole yetole can' chacda' neda' le'e. ¹³ Nono zoa bene' chaquech lježe' ca bene' chzanlaže' cuine' gate' neche bene' migw che'. Na' can' chona' neda'. ¹⁴ Na' le'e nacle migw chia' še chonle con can' nona' mandadw. ¹⁵ Na' bich žia' nacle bene' güen žin chia', le to bene' güen žin bi nezde' yogo' da' chon xanen', san žia' nacle migw chia'. Le

yogo'lol da' ba benda' gwna Xan' ba bzejni'idan' le'e. ¹⁶ Gague le'e gwlejele neda' naca' Xanle. Neda' gwleja' le'e cont chejnilaže'le neda'. Na' chseła' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejnilaže'le neda', gonczen'. ¹⁷ Da' nga da' chona' mandadw gonle, gague lježle tole yetole.

**Beñe' bi chesejnilaže' Diosen' cheseque'ede' beñe'
chosozenag che Jesúsén'**

¹⁸ Še beñe' bi chesejnilaže' Diosen' cheseque'ede' le'e, le gon xbab ba cheseque'eczedē' neda' cate' za' yesegue'ede' le'e. ¹⁹ Ša nacle txen len beñe' ca' bi chesejnilaže' Diosen', nachen' yesacde' le'e can' chesaque' beñe' lježen' šaca'. Perw ba gwleja' le'e cont chzenagle chia'. Da'nan' cheseque'ede' le'e da' bi nacle legaque' txen. ²⁰ Le šjasa'laže' dan' gwnia' le'e: "Note'teze mos bi naque' blaoch ca xanen'." Bosoči bososaca' beñe' neda', na' lecz ca' yesonde' le'e. Na' balze beñe' bosozenague' xtižan', lecze balze' yosozenague' xtiža'len'. ²¹ Na' da' bi zjanombi'e Diosen' ben' gwseła' neda', da'nan' yesonde' le'e yogo' da' ca', le cheseque'ede' le'e da' chzenagle chia'.

²² Ša neda' bi bedezejni'ida' legaque', bi zjanape' doła' da' cheseque'ede' neda' šaca'. Perw na'a bibi de da' yosode'ede' yesene' bi zjanape' doła'. ²³ Beñe' chgue'ede' neda' lente Xan' chgue'ede'. ²⁴ Ba bena' yela' guac da' nono nochle na' gon, na' šaca' bi besele'eden' bi zjanape' doła' da' cheseque'ede' neda'. Perw ba besele'ede' da' ca' na' bia'cze cheseque'ede' neda' len Xan'. ²⁵ Na' chac can' nyoj Xtiža' Diosen' dan' chososedē' gan' žan: "Besegue'ede' neda' la'czła' bibi da' mal bena'."

²⁶ Ba gwnia' le'e seła' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. ²⁷ Na' lecz ca' le'e cheyala' güe'le xtižan', le ba gwzoale len neda' šlac ba gwduxjue'eda' xtiža' Xa' Diosen'.

16 ¹ Ba gwnia' le'e yogo' da' ca' cont bi gacžejlaže'le. ² Le yesyebeje' le'e lo' yodao' chegaque' ca', na' gwžin ža cate' note'tez beñe' yesote' le'e yesacde' chebe Diosen' dan' chesonen'. ³ Yesonde' le'e yogo' da' ca' le bi zjanombi'e Xan' neca neda'. ⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw che Diosen'

'Bi gwnia' le'e yogo' da' ca' gac chele cate' za' gwzolao bzejni'ida' le'e xtiža' Diosen', le ne' zoacza' chaclena' le'e. ⁵ San na'a yeya'a gan' zoa Xan' ben' gwseła' neda', na' ne' tole bi chnabele neda' gan' yeya'a. ⁶ Na' ba chacyaše'le dan' ba gwnia' yeya'a. ⁷ Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach sełan' len le'e. ⁸ Na' cate' yid Spiriton' gwzejni'in benachen' zjanape' doła', na' gwzejni'in non' nac beñe' güen

len Diosen', na' gwzejni'in gata' castigw toli tocane che bene' bi chosozenague' chia'. ⁹ Spiriton' gwzejni'in legaque' zjanape' doła' da' bi chesejnilaže' neda'. ¹⁰ Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'. ¹¹ Na' gwzejni'in legaque' gata' castigw che xtoła'gaquen' toli tocane, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocane.

¹² 'Ne' dech da' zan da' nia' le'e, perw naquen zdebe šejni'ilen na'a.

¹³ San cate' yedeso Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. ¹⁴ Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'.

¹⁵ Xan' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

Jesúsen' gwne' šložze yesacyaše'de' na' techle yesyebede'

¹⁶ 'Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

¹⁷ Na' bale bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xan'? ¹⁸ ¿Bi zejen dan' že' yešlož? Bi chejni'icho bin' že'.

¹⁹ Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chnabe lježle bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? ²⁰ Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. ²¹ Cate' chzan no'olen' chžaglagüe' šlac chaque' bes che yela' sanna'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benach yežlio nga. ²² Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

²³ 'Na' cate' ba bžin ža šjayzoa' da' yoble gan' zoa Xan', cana'ch bich yažjele bi nable gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gonczen' le'e. ²⁴ Ža na'aža bibi na' nabele Xan' ye'lna' chnablen da' chejnilaže'le neda'. Na' na'a le nabe Xan' bi da' nabelene' ye'lna' ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

²⁵ 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'.

²⁶ Na' cate' ba bžin žana', cana'ch nabele Xan' bi da' nabelene' ye'ln'e' chnablen da' chejnilaže'le neda'. Na' bi yažjen nabda' Xan' gaclene' le'e.

²⁷ Le cuincze Xan' chacde' le'e dan' chaquele neda' na' chejle'le gwsele' neda'. ²⁸ Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

²⁹ Nach gose'ene':

—Bach cho'o diža' da' chejni'ito' na' bi cho'o jemplw. ³⁰ Ba chacbe'eto' nombi'o yogo' xbab che benachen'. Ba nezledo' bi chesaclaže' bene' yesenezde' cate' bina' yesenaben'. Da'nan' bach chejle'to' zao' gan' zoa Diosen'.

³¹ Na' gož Jesúsen' legaque':

—¿Ba chejle'le na'a? ³² Ba bžin ža na' na'a ba gole' gaslasle. To tole ca'a xnez che chele na' gwcu'a'ne toza'. Perw bi zoa' toza', le zoa Xan' len neda'. ³³ Ba gwnia' le'e ca' cont soa cuzle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

Jesúsen' gwñabde' Diosen' gaclene' bene' ca' zjanaque' le' txen

17 ¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gacbia' le' naco' bene' zaca' juisyw. ² Ba beno' neda' yela' chnabia' lao yogo' benach cont chnežjua' yela' mban toli tocane che yogo' bene' ca' ba gwlejo' chesejnilaže' neda'. ³ Na' bene' ca' zjanape' yela' mban toli tocane zjanombi'e le', le tozon' zaco' gonxento', na' lecze zjanombi'e neda' Jesucristw bene' gwselo'.

⁴ 'Lo yežlion' ba bena' cont nacbia' naco' bene' zaca' juisyw, le ba beyož bena' yogo'lo' da' gwlo'o lo na' gona'. ⁵ Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

⁶ 'Ba gwlejo' bal benach chesejnilaže' neda', na' bach blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. ⁷ Na' ba zjanезде' yogolol da' chona' na' yogo' diža' da' choa' zjanaquen chio' le'. ⁸ Le ba be'lena' legaque' diža' dan' ba bzejni'ido' neda' na' ba bosozenague' chen, na' ba chesacbe'ede' da' li gwza'a gan' zon', na' chesejle'e le len' gwselo' neda'.

⁹ 'Chnaba' gacleno' legaque'. Bi chnaba' gacleno' yogo' benach, san gacleno' bene' ca' gwlejo' chesejnilaže'nda' le ba zjanaque' lo nao'. ¹⁰ Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

¹¹ 'Na' n̄a'a bich soa' yežlio nga, perw bene' quinga chesejnilaže' neda' n̄ita'cze' yežlio nga, na' neda' ba zeza' gan' zo'na'. X̄a', naco' la'zelagüe bene' laždao' xilaže', na' ch̄naba' gw̄chino' yela' ch̄nabia' chio' cont gwcuas gwcuizo' da' malen' len legaque' cont n̄ita'cze' yesaque' toze len lježgaque', ca chio' naccho toze. ¹² Šlac ba gwzoa len legaque', neda' ba b̄china' yela' ch̄nabia' chion' cont bcuas bcuiža' da' malen' len legaque'. Da'n̄an' n̄e toe' bi gwžiai'yi', con toz ben' ba naquen cuiaye'e cont gac doxen can' ža Xtižo' dan' nyojen.

¹³ 'Na' n̄a'a ba zeza' gan' zon', na' šlac n̄e' zoa' yežlio nga cho'a diža' quinga cont bene' qui n̄ita'chgüe' mbalaz ca mbalazen' zoa' neda'.

¹⁴ Neda' ba be'l̄ena' legaque' xtižon', na' bene' ca' bi chesejnilaže' le' cheseque'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'. ¹⁵ Na' ca' nac bene' ca' chesejnilaže' neda', bi ch̄naba' yeca'o' legaque' lo' yežlio nga, san ch̄naba' gacleno'ne' cont Satanás dan' ch̄nabia' da' xigüe' ca' bi siye'en' legaque'.

¹⁶ Legaque' bi zjanaque' txen len bene' bi chesejnilaže' le', ca' neda' bi naca' txen len bene' bi chesejnilaže' le'. ¹⁷ Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. ¹⁸ Len' gwselo' neda' yežlion' cont ba bia' xtižon', na' lecze ca' chsel̄a' legaque' yeso'e xtižan'.

¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

²⁰ 'Na' bi ch̄naba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. ²¹ X̄a', ben cont yogo'lole' yesaque' toze len lježgaque' na' yesaque' txen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwselo' neda'. ²² Na' yela' bala'an̄ dan' nono' neda' ba bnežjuan' legaque' cont zjanaque' toze len bene' lježe' ca' chio' naccho toze. ²³ Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwselo' neda' na' yesacbe'ede' chacdo' bene' ca' can' chacdo' neda'.

²⁴ X̄a', chacdo' neda' cate' bina' x̄e yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw. ²⁵ X̄a', naco' la'zelagüe bene' chon da' zej to licha. Na' ca' nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanезде' len' gwselo' neda'. ²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

Judasen' bdie' Jesúsén' lo na' soldadw ca'
(Mt. 26:47-56; Mr. 14:43-50; Lc. 22:47-53)

18 ¹ Beyož gwna Jesúsén' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ején'. ² Na' Judasen' ben' ba naquen gone' Jesúsén' lo na' bene' ca' chesegue'ede' le' lecze nombi'e latjen', le zan ni'a Jesúsén' len bene' ca' zjanaque' le' txen ba besedobe' na'. ³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bxoz gwnabia' ca' na' bene' fariseo ca' cont yesezene' Jesúsén'. Zjanxobe' no lintern na' zjanoxe' no yi' yech na' zjanale' spada. ⁴ Jesúsén' ba nezde' yogo'lol da' za' gac che', na' bchoje' jašague' legaque' na' gwne':

—¿Non' cheyiljwle?

⁵ Na' gose'ene':

—Cheyiljwto' Jesús bene' Nazaret.

Na' gož Jesúsén' legaque':

—Nedan'.

Na' Judasen' ben' ba naquen gone' Jesúsén' lo na' gaquen' zelene' legaque'. ⁶ Cate' Jesúsén' gože' legaque': “Nedan”, la' besyebiga'te' cosxanle na' jasechaze' lo yon'. ⁷ Na' da' yoble Jesúsén' gože' legaque':

—¿Non' cheyiljwle?

Na' legaque' gose'ene':

—Cheyiljwto' Jesús bene' Nazaret.

⁸ Na' Jesúsén' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

⁹ Gwne' ca' cont goc can' ba gwduxjue'ede' caten' gwne': “Ne to bene' ca' ba gwlej Diosen' chesejnlaže' neda' bi yesebiaye'e.” ¹⁰ Na' Simón Pedron' no'e to spada na' goljen' gw dinen' mos che bxoz blaon' gwchogtechgüe' nague' licha. Na' mosen' le' Malco. ¹¹ Na' Jesúsén' gože' Pedron':

—Bego'o spada chion' lo' ližen'. ¿Chacdo' bi cheyala' gac da' ba nžia bia' Xa' Diosen' gac chia'?

Goseche'e Jesúsén' lao ben' le' Anás
(Mt. 26:57-58; Mr. 14:53-54; Lc. 22:54)

¹² Nach soldadw ca' len xanguaque' na' len bene' chesape' yodao' blaon' che nación Israel cheton' gosezene' Jesúsén' na' bosoche'je'ne'. ¹³ Na' goseche'ene' da' nechw lao Anás ben' naque' xta'obi'in che Caifás. Na' Caifásen' goque' bxoz blaon' che nación Israel cheton' lo izen'. ¹⁴ Na' Caifásna' ben' gože' bene' gwnabia' cheton' napen legaque' cuent toz ben' gat clel ca cuiayi' yogüe'.

Pedron' bi gw̄chebe' naque' Jesúsén' txen*(Mt. 26:69-70; Mr. 14:66-68; Lc. 22:55-57)*

¹⁵ Simón Pedron' len yeto bene' naque' Jesúsén' txen gosa'ogüe'ne'. Na' nombia' ben' nac b̄xoz blaon' ben' yeto. Da'nán' goc gwyo'e len Jesúsén' chyo'o che b̄xoz blaon'. ¹⁶ Na' Pedron' bega'ane' do cho'a puerten'. Nach ben' yeto, da' nombia' b̄xoz blaon' le', gwyeye' na' be'lene' diža' bi' no'olen' chap cho'a puerten' cont gwlo'obe' Pedron'. ¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyeže'ede'. Na' Pedron' ze' len legaque' cho'a yin' cheže'ede'.

Gosen̄abde' Jesúsén' che dan' chsed chlo'eden'*(Mt. 26:59-66; Mr. 14:55-64; Lc. 22:66-71)*

¹⁹ Na' ben' nac b̄xoz blaon' gwn̄abde' Jesúsén' che bene' ca' chosozenag che dan' chsed chlo'eden' na' che da' ca' chzejni'iden'. ²⁰ Na' Jesúsén' gože'ne':

—Ba bi'a diža' doxen latje lagüe. Zan ni'a b̄sed blo'eda' lo' yodao' checho ca' na' chyo'o yodao' blaon' gan' chesežag yogo' bene' gualaž chechon'. Bibi diža' gwnia' bagaše'ze. ²¹ ¿Bix̄chen' chn̄abdo' neda'? Gwn̄abe bene' ca' gosende' dan' b̄sed blo'edan'. Legaque' zjanezde' bi dižan' bia'.

²² Beyož gwna Jesúsén' ca', to ben' chape yodao' blaon' zie' na', na' gw̄dape' x̄aguen', gože'ne':

—¿Ca' choži'o x̄tiža' ben' nac b̄xoz blaon'?

²³ Jesúsén' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bix̄chen' chgapo' neda'?

²⁴ Nach Anásen' b̄die' Jesúsén' ncheje' lao Caifásen' ben' nac b̄xoz blaon'.

Da' yoble Pedron' bi gw̄chebe' še naque' txen len Jesúsén'*(Mt. 26:71-75; Mr. 14:69-72; Lc. 22:58-62)*

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gw̄chebe', gwne':

—Bi lena' neda'.

²⁶ To xmos b̄xoz blaon' naque' biše' ljež ben' gw̄chog Pedron' naguen', na' l̄e' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

²⁷ Na' Pedron' da' yoble bi gw̄chebe', na' la' gw̄chežte to jea.

Goseche'e Jesúsen' lao Pilaton'

Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseche'ene' gan' zoa gobernador Pilato ben' chon yela' justis. Na' legaque' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' l̄ni pascon' še yeso'e gan' že' bene' bi zjanac bene' Israel. ²⁹ Da'nan' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' bene' gwnabia' ca' gosene':

—Šaca' benga bi naque' bene' güen da' xinj bi bdeto'ne' lo naon'.

³¹ Na' gož Pilaton' legaque':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de lsens gotto' bene'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'. ³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

³⁴ Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

³⁵ Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' b̄xoz gwnabia' chele ca' bosodie' le' lo na' nga. ¿Bi da' xinj benon'?

³⁶ Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedile' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benachen' diža' li na' yogo' bene' chesone' txen len diža' li chosozenague' chia'.

³⁸ Nach gož Pilaton' le':

—¿Bi dan' diža' li?

Gosechoglagüen' yesote' Jesúsén'
(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaque':

—Bibi nla'lagüe še bi da' xinj non benga. ³⁹ Perw na' de costumbr chele gwsana' to bene' de ližya lo lni pascon'. ¿Chaclaže'le gwsana' benga naque' Rey che le'e bene' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19 ¹ Nach Pilaton' bene' mandadw goseyine' Jesúsén'. ² Na' soldadw ca' gosone' to corona de xis yeše' na' bosozoen' yichj Jesúsén' na' bosoguacue'ne' to lache' moradw ca da' chosočin no rey.

³ Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsén' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaque':

—Le na', nga ze ben'.

⁶ Na' bxoz gwnabia' ca' na' bene' chesape' yodao' blaon' cate' besele'ede' Jesúsén' na' bososye'e zan ni'a gosene':

—iBde'e le'e yag cruz! iBde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'in Dios, le con to benachzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'. ⁹ Na' beyo'e yo'o gan' zoe' da' yoble, nche'e Jesúsén', na' gože' Jesúsén':

—¿Ga bene' le'?

Na' Jesúsén' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi nezdo' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

¹¹ Jesúsén' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' dola' ca le'.

¹² Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata. ¹⁴ Do guagwbiž ža cate' za' solao Ini pascon' Pilaton' gože' bene' gwnabia' cheto' ca':

—Le na', nga zoa rey chelen'.

¹⁵ Nach da' yoble gosezolagüe' bososye'e gosene':

—iCheyala' gate'! iBde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach bꝁoz gwnabia' ca' gose'ene':

—Gague rey cheto' benga. Toze César naque' rey cheto'.

¹⁶ Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudan'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. ¹⁸ Na' soldadw che gobernadoren' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachol bene' ca' chope'. ¹⁹ Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: “Jesús bene' Nazaret, Rey che bene' Israel”. ²⁰ Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'. ²¹ Nach bꝁoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' “Rey che bene' Israel”, san bzoj: “Le' gwne' naque' rey che bene' Israel.”

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. ²⁴ Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: “Besyele'e xalanan' legacze', na' gosone' rifa lache' dan' chazan'.”

²⁵ Na' do gala'ze yag cruz che Jesúsén' zecha Maríán' ben' nac xna' Jesúsén' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. ²⁶ Na' cate' Jesúsén' ble'ede' zecha xne'en gala'ze len to bene' naque' le' txen, bene' chaquechgüe Jesúsén' le', nach gože'ne':

—Bena' gaque' ca xi'ino'.

²⁷ Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

Can' goc caten' got Jesúsén'

(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsén' ba nezde' bačh goc yogo' da' cheyala' gac. Nach cont goc can' ža yelate' Xtiža' Diosén' da' nyojen gwne':

—Chbilda' nis.

²⁹ Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsén'. ³⁰ Na' beyož gwxxop Jesúsén' vinon' na' gwne':

—Bačh goc yogo'loł da' cheyala' gac.

Nach bcheque' yichjen' gote'.

To soldadw godoe' lanza cuit le'e Jesúsén'

³¹ Na' yeteyo gaquen ža che Dios na' ža lni xen, da'nán' bene' gwnabia' che nación cheton' jasenabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosacłáže' yeseda'ch bene' ca' le'e yag cruzen' ža che Dios. ³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsén'. Na' lecze ca' gosone' len ben' gwda' le'e yag cruzen' cuiten' yešla'a. ³³ Na' cate' besežine' gan' da' Jesúsén', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsén', na' la' bchojten chen len nis. ³⁵ Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. ³⁶ Na' goc da' ca' len Jesúsén' cont goc can' ža Xtiža' Diosén' da' nyoj che', žan: “Ne to žit yo'e bi yeseyišjue'.” ³⁷ Na' yeto da' žan: “Yesene'e ben' ba bosožie' güe'.”

Bosocuaše' Jesúsén'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea janabde' Pilaton' gwnežjue' lsens yeque'e cuerp che Jesúsén'. Na' Pilaton' be'e lsens. Nach Josén' gwyeje' na' beque'e cuerp che Jesúsén'. Josén' ba chejnilaže' Jesúsén' perw chejnilaže'ne' bagaše'ze da' chžebe' bene'

gwnabia' cheto' ca'. ³⁹ Na' len Josén' lecze gweyē Nicodemo ben' ba gweyē gan' zoa Jesúsēn' šeže'le. Na' Nicodemon' no'e to da' chla' zix da' none' len yal dan' že' mirra, na' len to bište dan' že' aloes, ca do šona roben'. ⁴⁰ Nach bosyochele' cuerp che Jesúsēn' to lache' xen na' len dan' chla' zixēn', ca' chon neto' beñe' Israel cate' chcuāše'to' beñe' guat. ⁴¹ Na' gała'ze latje gan' bosode'e Jesúsēn' le'e yag cruzēn' gota' to le'ej ga goseze yag. Na' na' za' goseche'ene' to bloj cont yosochinen' ca to ba, na' nono beñe' guat na' šo' lo'enna'. ⁴² Ža catēn' got Jesúsēn' naquen ža catēn' chososini'e che ža che Diosēn'. Na' da' chesacbyende' yosocuaše'ne', da'nān' jaseło'e Jesúsēn' lo' bloj coba', le naquen gała'ze.

Jesúsēn' bebane' ladjo beñe' guaten'

(Mt. 28:1-10; Mr. 16:1-8; Lc. 24:1-12)

20 ¹ Na' bal dmigw María beñe' Magdalan' gweyeje' cho'a blojen' gan' bosocuaše' Jesúsēn' na' ble'ede' ba bga'a yejen' dan' bosode'e cho'a blojen'. ² Nach beza'sese' beyeje' gan' zoa Simón Pedron' len yeto beñe' naque' Jesúsēn' txēn, na' gože' legaque':
—Ba besyebeje' Xanchon' lo' blojen' na' bi nezeto' ga besyeyo'ene'.
³ Nach Pedron' na' ben' yeto gosa'aque' ja'aque' cho'a blojen'. ⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enna' ca le'. ⁵ Na' bcheque' gwne'e lo'enna' na' ble'ede' lache' ca' zjachin' lo' yo perw bi gwyo'e. ⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. ⁷ Na' bay dan' bosoguazje' yichjen' bi chin' gan' chi' lache' ca', san ndoben chin' šla'ale. ⁸ Nach lencze ben' yeto gwyo'e, le bina' šo'e la'czla' byobech bžine' cho'enna', na' ble'ede' can' naquen na' gweyje'le'e. ⁹ Le bina' yesejni'ide' Xtiža' Diosēn' da' nyojen žan cheyała' yebane' ladjo beñe' guaten'. ¹⁰ Na' besyeya'aque' jaya'aque' yo'o gan' nite'na'.

María beñe' Magdalan' ble'ede' mbancze Jesúsēn'

(Mr. 16:9-11)

¹¹ Na' Marían' bega'ane' na' gwzeche' gała'ze cho'a blojen' chbeže'. Na' ne' chbežte' ca' bcheque' gwne'e lo' blojen'. ¹² Na' ble'ede' chope angl beñe' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsēn'. ¹³ Nach gose'e no'olen':

—¿Bixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marían' ca' gweyechje' ble'ede' zecha Jesúsēn' cožen', perw bi gocbe'ede' še naque' le'. ¹⁵ Na' gož Jesúsēn' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesús'en' gože'ne':

—iMaría!

Na' Marían' gwyechje' da' yoble na' gože'ne':

—iRaboni! —naquen to diža' hebreo na' zejen Maestrw.

¹⁷ Jesús'en' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesús'en' le ba ble'ede' Xanchon'.

Bene' ca' zjanaque' Jesús'en' txen besele'ede' mbancze'

(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choł že' dmigon', bene' ca' zjanaque' Jesús'en' txen zjandop zjanžague' lo' yo'o na' zjanseyjwte' puert ca' da' besežebe' bene' gwnabia' che nación Israel cheton'. Nach Jesús'en' ble'e na' gwze' gachol legaque'. Na' gože' legaque':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le naque' Xanchon'. ²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwsela' Xan' neda' yežlio nga bia' xtižen', lecze ca' neda' chsela' le'e güe'le xtižan'.

²² Beyož gwne' ca' blobe' legaque' na' gože' legaque':

—Le si' Spiritw che Diosen'. ²³ Bene' ca' yesyetenje xtoła'gaquen', naple yela' chnabia' ye'ln'e' ba gwnitlaon, na' naple yela' chnabia' cont ye'le bene' bi yesyetenje xtoła'gaquen' bitw nitlaon.

Tomás ble'ede' mban Jesús'en'

²⁴ Na' Tomás ben' bososi'e Tomás Cuaš lene' len bene' šižinw ca' ba gosedalene' Jesús'en', na' bi gwzoe' cate' Jesús'en' bedyelo'elagüe' legaque' že' dmigon'. ²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomás'en' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomás'en' len legaque'. Na' da' yoble nyeyjw puert ca', cate' bezla' Jesús'en' na' gozzeche' gachol legaque'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomás'en':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásen' gože'ne':

—iXana' na' Dios chia'!

²⁹ Na' Jesúsén' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho Jesúsén' naque' bene' gwsela' Dios

³⁰ Da' zan yela' guac ben Jesúsén' da' besele'e bene' ca' zjanaque' le' txen da' bi nyojen nga. ³¹ Perw zjanyoj da' quinga cont šejle'le Jesúsén' naque' Cristo ben' gwlej Diosén' cont nabi'e na' naque' Xi'in Dios, na' cont gata' yela' mban toli tocane chele da' chejnilaže'lene'.

Jesúsén' blo'elagüe' gaže bene' ca' zjanaque' le' txen

21 ¹ Gwdechle yeto ža yoble Jesúsén' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: ² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yečhope bene' ca' zjanaque' Jesúsén' txen. ³ Na' Simón Pedron' gože' legaque':

—Ša'a gwxcen bel da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdan' na' goso'e to lo' barcw. Na' nocze no bel beseželde' že'na'. ⁴ Na' do ba zoa šeni' besele'ede' zecha Jesúsén' cho'a nisdan', perw bi gosacbe'ede' še Jesús nan'. ⁵ Nach Jesúsén' gože' legaque':

—Bene' migw chia' žnono bel chdole'le?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw bel chelen' cuit barcon' lichale na' senlba'.

Nach bosozala' yixjw bel chegaquen', na' tantw be zan besedola', bi gosezoede' yosyocuen' lo' barcon'. ⁷ Nach ben' chaquechgüe Jesúsén' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsén'. ⁸ Na' yezica'chle bene' ca' zja'aclene' barcw daon' zjanxobe' yixjw gan' že' bel ya'a ca'. Bi naquen zito' cho'a nisdan', ca do yeto gayoa metrže. ⁹ Na' cate' besyežine' cho'a

nisdaon' besele'ede' chi' yi' ya'alj na' xoa bel ya'a lagüenna' na' len yetextil. ¹⁰ Na' Jesús'en' gože' legaue':

—Le yeyoxe' ngale to chope bel ya'a ca' za' gwxenle.

¹¹ Na' Simón Pedron' gwyeye' jaxi'e yixjw belen' gan' chi' barcon' na' bexoben' ga nac yo biž. Žen' to gayoa ši'ineyon bel xen, perw bi bcheza' yixjon' la'czla' be zan gwže' lo'enna'. ¹² Na' Jesús'en' gože' legaue':

—Le da gagwle xsil.

Na' ne toe' bi besyeyaxjde' ye'ene': “¿No le?”, le ba gosacbe'ede' naque' Xanchon'. ¹³ Jesús'en' gwbigue' na' gwxi'e yetextilen' na' bnežjue' che to toe' na' lecz ca' bene' len bel ya'an.

¹⁴ Da'na' goc da' gwyon ni'a blo'elao Jesús'en' bene' ca' zjanaque' le' txen gwde bebane' ladjo bene' guaten'.

Jesús'en' be'lene' Simón Pedron' diža'

¹⁵ Na' cate' besyedagüe', Jesús'en' gože' Simón Pedron':

—Simón xi'in Jonás, ¿chaquechdo' neda' clel can' chesaque bene' quinga neda'?

Pedron' boži'en gože'ne':

—Xana', nezdo' chacda' le'.

Jesús'en' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

¹⁶ Na' da' gwchop ni'a gože' le':

—Simón xi'in Jonás, ¿chacdo' neda'?

Na' da' yoble gwna Pedron':

—Xana', le' nezdo' chacda' le'.

Jesús'en' gože'ne':

—Bgüia gwna' bene' ca' chesejnilaže' neda', bene' ca' zjanac ca xila' chia'.

¹⁷ Da' gwyon ni'a gož Jesús'en' le':

—Simón xi'in Jonás, ¿chacdo' neda'?

Na' Pedron' gocyaše'de' dan' gož Jesús'en' le' ca' da' gwyon ni'a, na' gože' le':

—Xana', le' neze nle'edo' yogo'lol. Nezdo' chacda' le'.

Jesús'en' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.

¹⁸ Da' li chnia' le', cate' goco' bene' güego', cuino' gwyaz xalanon' na' gwyejo' con ga žan chio'. Perw cate' gaco' bene' gole, gwli naon' na' bene' yoble chize' xalano' na' yeche'e le' ga bi chaclažo'.

¹⁹ Gože'ne' ca' cont gwnezde' can' gacxen Diozen' len da' gac che' cate' žin ža gate'. Na' gwde gwna Jesús'en' can' gac che Pedron' nach gože'ne':

—Con gwejnilaže' neda' na' bzenag chia'.

Can' gwna Jesúsen' che ben' chacchgüede'

²⁰⁻²² Na' yeto bene' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', ¿nac gac che benga?

Jesúsen' gože'ne':

—Še chaclaža' ne' zoacze' cate' yida' yeto ¿bin' chacžejlažo'? Con gwzoateze gwejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo na' bene' ca' chesegue'ede' le'. Na' cana' bena' gwnabde'ne': “Xana', ¿noxen' gwdie' le' lo na' bene' ca'?”

²³ Na' dan' gož Jesúsen' Pedron': “Še chaclaža' ne' zoacze' cate' yida' yeto ¿bin' chacžejlažo'?”, da'nan' gwditj diža' len bene' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': “Še chaclaža' ne' zoacz benga cate' yida' yeto, ¿bin' chacžejlažo'?”

²⁴ Nedan' nezda' can' goc yogo' da' quinga na' da'nan' ba bia' diža' chegaquen na' ba bzojan'. Na' lecze le'e nezczele choa' diža' li.

²⁵ Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' na'a.